






PL
2698
Y36N5
1727
v.1














翠

同

三

彈詞注

樹玉堂藏板



廿一史彈詞舊序

世傳用修成滇南常傳胡粉支髮爲兩角髻行歌市中
余竊疑之謂賢達何放廢如是及得用修廿一史彈詞
喟然歎曰用修行吟自廢豈無意歟夫世之刪史者不
過節約其文與事備勸戒便觀覽而已用修不然先之
以聲歌繼之以序說雜以里語街談隳括參差自然成
韻似正似諧似俗似雅似近似遠其意豈徒以自廣已
哉蓋痛古今之須臾悲興亡之倏忽而橫目之民悠悠
以難悟也故爲曼聲以送之使言者足以感聞者易以
思殆懷屈子沉湘之志而復能自脫於莊列達生之旨
不失其正而亦不傷其生者乎夫用修以元輔子擢制

策首其一時寵遇豈不盛哉及一朝遣戍終老南裔無
望賜環彼聰明才悟殆有過人者也見夫苑枯華落陵
谷變遷轉眼無定不以此一死生齊物化而徒怨歎感
憤以懟君父而夭其生則似愚矣故託往事藏來者短
詠長歌傀儡千古披髮行吟以自全而不以爲恥嗟夫
世何常語亦何常談言解紛利在微中世有奸雄懷禍
亂而不悔如焚原烈澤不可向邇一旦庸夫孺子巷陌
之謠片言入耳向日凶燄輒烟銷灰冷不待黃泉而氣
息已盡何哉誠有以動其心也凡人暗於自見未有不
明於見人今觀用修所述纍纍萬餘言上自鴻龐下迄
勝國其間皇帝王伯忠孝賢聖之驅馳亂臣賊子之縱

橫戎狄盜賊之生滅靡不兼總條貫其詞可竹可絲可
語可笑至於重復悲慨淒其斷絕令人一而歎再而悔
如雍門之哦一市人皆泣如越石之嘯羌胡皆涕泗沾
衣投戈北去而不自知其哀痛之何從也是真所謂情
淡於騷而用廣於騷者歟時初夏余方晝臥北窗下聽
黃鸝歌金縷忽忽睡去夢身至堯禹所左右臂化爲臯
夔共驩轉屬遷換下至莽操懿溫尿溺轉化與同作賊
旋復剖心出視變爲禰衡諸烈士又變作庭前舞馬殿
下孫供奉興兵仗劒搥鼓掀衣殺賊罵賊城郭山川罔
不遍歷侯王將相東討西征屠戮誅夸生死死生不可
勝數旋及爪髮毛毫反復變化覺帝王聖賢所爲甚苦

欲旦暮解脫不可即得又覺莽操懿溫亦無樂境刀鋸
焚炙無有苦惱俯視北邙高墳卑塚白骨枯骸皆身受
享所過不復悲憶輒復歌曰將軍戰馬今何在野草閑
花遍地愁忽然驚寤則兒子鼎持此詩話歌且讀於旁
也推枕而起黃鸝在樹花影當庭拭眼悲悔謂聲塵不
淨耳受乃爲身受夢作即同真作因歎黃梁一夢果不
欺人鼠肝蟲臂俱爲蝶化慨然有赤松安期之想噫人
生若朝露將晞古今三百二十七萬八千餘年亦刹那
間事但聖賢豪傑於夢中得好光景耳若漢唐宋來亂
臣賊子朋黨交傾正如迷人夢入惡境顛倒呻吟不能
自醒昔用修旣放一時諸臣多貴盛者爾時君臣相得

不啻魚水然其賢者旣憂讒畏譏不肖旋被褫斥甚而
藁街爲戮名在丹書淒涼千載悲夫賢愚共盡黃土悠
悠以視用修傳粉悲歌漁樵唱和猶贏得一場清夢也
時天啓癸亥九日古吳宋鳳翔羽皇題

引三ノ入

彈詞註凡例

一彈詞一書義宗經傳詞類風騷自開闢以來流傳
世代君臣賢否國運短長統在數十頁內洵讀史
便捷法門也維揚董昭侯舊有刊本桐川陳上儀
秀水王季延朱葵石更加訂正重鐫行世閱者咸
知是書之功不在全史下而服習者恒少良由博
極群書語多不解璜承父命按詞註解考證詳晰
如四書之有集註讀者源委悉明講者尋繹不倦
俾一部廿一史從容漸漬淹貫於胸中所記約而
所通博是詞之有功史學良非尠已

一是書將遷固以後宋濂王禕以前汗牛之史縮爲

一冊而浩博之才更於正史外無書不供採取今
遵廿一史逐詞細註其正史所無亦必於引用諸
書考核根據確有載籍出處者方敢入註惟每段
之開場詞調詩句及結束咏嘆數行係作者詞外
流連低徊不盡之意無關正史故略而不註

一本詞每行三句句共十字有十字一事者有三句
分三事者有一句兼二三事者作者語有根原字
非泛設註亦事事詳釋不敢忽略一字

一詞分十段一總說二三代三秦漢四三分兩晉五
南北六五胡七隋唐八後五代十一國九宋遼金
夏十元史如某段說某朝先於是段詞前總說是

朝世次共享國若干年今更於世次之下分註各主在位年數至漢武帝後並附註正閏年號俾初學順便一覽即知歷代改元建號並知各主年數多寡目省而功倍間有在位年數註與詞異緣註遵綱目編年亦不附會本詞是在讀者再加攷証一歷代迭興改易郡邑建置迴殊詞內封爵事實戰爭之處所載地名止據史書各隨朝代郡縣隨地列名有漢是而晉非唐因而宋革者若不考前代廢興何名近日隸轄何省則茫不知其所在今璜搜考方輿勝覽廣輿記廣皇輿攷一統志諸書於圈外附註逐條之後庶讀者隨註考地知某朝某

郡邑都鄙即今某省府州縣衛所下及邊荒僻壤
一水一山亦必考證新舊方名間有輿圖查檢無
據者則於註末直書曰未詳以備考核閱者鑒之
一歷代盛衰事故作者止憑己意論斷原不計事之
前後連貫有一事而時歷兩朝一人而略前詳後
者若止就詞演事未免有尾無首今每註一事必
遡厥初若何要終若何或以先是云云至是云云
俾其端委畢悉庶無掛漏

一註依正史務期闡發詞義不至含糊其史句文義
間有深晦難解及名號今古不同事實典故正史
本文未經縷析者又必於圈外再加補註總期無

義不悉展卷了然

一詞內間有前朝事實誤入後代及引用有戾正史者由縱筆疾書採用偶訛今不便將某事改歸某代仍於本詞註明此事原委止云按史如何云云而於註末駁正曰疑誤

一詞內有一語而稱述前後重出者不便一註再註即於本詞下註明註見第幾段某句下有一事而前道其始隔數行而後述其終其此事文義不便割裂兩截則於詞之後句一總註釋止於前詞句下書曰註見下以省重複

一史書所載各異如三皇五帝仲丙外壬之類所傳

近誣如以呂易羸以牛易馬之類以及附會傳疑如燭影斧聲之類不一而足璜於本事註後或採昔人論斷或據近日新編間附已見一破野史荒謬或亦考古論世者所樂聞也

一帝王謚法及后妃公主名字足稽者附詳註後字有難識者并爲音釋以免訛錯

一引用古人名號有稱名稱字稱號或稱別號及所居縣名與書院名並稱其封爵謚號一人而數易其稱頗爲難記今於各朝詞內之賢相名臣忠孝廉節古今聲施不朽者皆於註後標明字某號某某處人某爵某謚以爲博古之一助但里居一仍

各朝舊日地名不敢易舊從新恐引用反疑悖古
或人有重見者名不重標若其爵謚雖有人不足
錄者槩略不書

一彈詞止於元末其明紀彈詞一書係先子乙卯於
武林續著因時近事繁不比往古槩可簡略故詞
務精詳璜謹註釋成卷綴於十段詞後亦爲一段
分作上下兩卷奈明史尚無成書祇據明紀編年
崇信錄鴻猷錄史竊通紀廣彙紀事本末昭代紀
略歷代小史諸書採用成詞恐歷朝頗多缺略是
非或有謬誤尚希鴻筆駁正是則彈詞之幸而璜
與先子之厚望也

晴川張仲璜別麓謹識

彈詞註序

彈詞註一書余於甲寅秋侍先大夫於武林受命所註
今付諸剞劂有謂篋藏三十七年忽授之梓者何居曰
不欲梓者余之心不能不梓者余仰體先大夫之心也
先大夫於癸丑冬解組會稽旅寓西湖日手彈詞一編
咏歌不輟又以明代缺如因綜有明三百年事續著彈
詞顧謂余曰楊先生放廢滇南時其胸中抑鬱一往忠
君愛國之心無可寄寄之歌詞一彈再鼓隱寓夫勸懲
來世扶正人心之旨予並續明詞俾無缺漏惟是詞意
隱括恐讀者按詞忘事其於勸懲之旨終覺展卷茫然
汝其綜此兩書詳註而急梓之以公同好可耳予聞命

跪而請曰大人不以璜之不肖命註彈詞敢不奉嚴命
然竊思之古者聖作明述有經必有傳有是書必有是
書之箋註但後儒學尚訓詁雖六經皆有註疏每多失
經之本旨即如三傳有功於春秋而馬融不能無異同
之疑合註有功於左氏而杜預且引爲一人之癖古人
著述之難類如此况升菴彈詞揉全史爲十段采用宏
博大人續補明詞並驅不朽倘蒐羅未廣攷核未詳遽
登梨棗貽笑通儒非大人所以命璜之意也敢請緩之
先子曰然古人十年而成一賦註書豈厭詳慎汝其勉
之余唯唯而退由是篝燈起稿繙閱群書根究事蹟悉
其原委歷寒暑而註幾成可以梓矣而未遽梓者不敢

辭書成爰命璜兒并加詳註勿滋遺漏之咎因竊念廿
一史皆數千萬年已往事布之街談巷詠有知者有不
知者若明代始嚴於法網繼慘於靖亂厥後元氣喪於
權璫禍亂釀於門戶而沉陸中原烟銷於闖獻二賊父
老猶有能道其軼事者一聆此詞有不如耳所習聞道
所見慣者乎雖

聖朝屢勅詞臣纂修明史固有藏之石室懸爲金鑑者
若以此草野新聲當江天日晚林下風清雜之漁歌樵
唱中使愚夫愚婦聞之知若者爲忠臣若者爲義士若
者爲亂臣賊子於以油然興惕然醒焉亦廉頑立懦之
一徵也况前事爲後事之師後車鑒前車之覆今歷歷

指陳較若列眉即據以考鏡得失謂非古今來殷憂啓
聖之一助耶請以是質之光祿其心或亦可無遺憾也
已漢陽張三異禹木題於武林之儲祉堂

廿一史彈詞註序

文體之有正變謂非時遇之順逆使然乎何以明其然哉時際休隆珥筆纂述則即以胸中瑰瑋發爲文章彤管流徽賡揚盛事此遇之順而文之正也不幸而爲孤臣孽子憂讒畏譏或招沉湘或悲賦鵬致寄慨於蟲魚因寓情於草木其遇則逆其文則變所固然也然遇有順逆文有正變而皆以不外勸懲扶正人心者乃足歌咏於不衰余居恒披史每思數十家之浩繁讀者猝難竟業思得一指南捷訣俾義軒而下元明以上條分縷析言約旨該觀者瞭如指掌誦者洋洋盈耳於以引掖兒輩祕之家塾卒戛戛乎難之乃偶於書肆斷簡中得

用修楊先生廿一史彈詞而竊歎先生之先獲我心也
先生以元輔令嗣舉制科大元爲天下第一聞人不幸
以議大禮放廢著書一百零九種見行海內而彈詞一
書胡未之載或曰此先生不得志於時之所爲也零裁
雲錦碎剪氷紋恐類詼諧涉嘲諢故祕而不傳未可知
也予曰不然文體雖變而大義不渝即如虞書府事嘗
著功於九歌毛詩三百皆不離乎風雅况先生博綜記
載隳括微言褒貶一法春秋而不必有知罪之懼論列
無殊班馬而不必操著作之權故變幻參差縱橫絕續
止借里謠巷詠以抒其弔古談今之懷意不主於詼諧
而實藉以提撕告誡語非取於嘲諢而有裨於群怨興

觀其聲可供絲竹而其義可作箴銘其謳吟悲慨可醒
愚婦愚夫而禾黍流連亦可悟賢君賢相歛歛往古接
引將來先生雖不顯居其名而其功豈遂出全史下哉
倘後之讀史者不爲昭揭而使珠玉沉埋謂非表章者
之責乎幸秀水諸公什襲家笥用光剗剗庶不負作者
苦心並可爲讀史者之津梁矣獨是先生以曠世逸才
擅一代著作手極往古來今興亡治亂之推遷以及正
閏僭竊之升沉數十百家言人人殊而先生按節諧聲
引商刻羽出之一唱三歎寓至微於至顯之中藏至奇
於至平之內是非全史博通五車淹貫能窺此乎第恐
初學涉獵未週達此失彼將先生爲勸爲懲扶正人心

之意把卷茫然欲臥者矣爰命璜兒一一詳爲註釋務使事實可稽義蘊昭晰歷寒暑數易稿而書始成雖全史蘊藉未易表著而屬詞比事先生之苦心庶幾若睹矣嗣有知者謂先生約衆史之班駁爲便覽之新聲俾讀者事半功倍以爲扶誘之功臣可也若謂揉全史之莊重作艷綺之柔詞爲涑水鄱陽毘陵諸公之罪人則不可也謂斯註釋發明隱義爲古學片筏作彈詞演義可也若謂援古引經出處明晰斷章取義序次井然於勸懲大義可爲前賢後哲之功臣則不敢也而余因是竊有感矣夫人生境遇順逆亦何常之有向使先生遇際其順亦不過爲卿爲相澤被一時已耳烏能感慨淋

漓低徊於萬千年之變遷百數十君之得失渾括於三
萬言內而唱歎無餘與龍門涑水同其俯仰可立言不
朽也哉然則先生之遇逆也而未始不順也先生之文
變也而仍不失其正也烏得以類詆譭嘲謔莫爲之
後致有美弗彰乎因是梓而行之爲之序以公同好云
康熙甲寅長至月漢陽張三異禹木題於西泠客舍

明紀彈詞序

彈詞以三萬餘言櫟括廿一史光祿之才豈後人所可及哉乃猶有遺漏俟王子季延補苴之予觀其所遺數事不過萬中之一二補苴易耳至若有明一代全史概未得纂集先生才雖大勢不能留其身於百年後以續前詞豈非憾事乎余與璜兒既爲先生註其已著之詞而弗續其未備之詞不同一憾事乎因不揣固陋追繹先生之心廣蒐明紀諸書合二祖十四宗之蹟撮要敷陳比音叶節雖東施效顰才非先生之才而心則猶是先生之心也先生生明武宗朝上溯洪武歷一百四十四年更十君其間治亂安危自開國以至遜國自仁

宣以至土木之變自弘治以至宸濠之叛皆先生所已知者其爲可驚可喜可歌可泣之事皆先生所亟欲播之聲歌而孤臣直筆不欲以微詞掩也自世廟下逮懷宗閱九十五年更六主其間由嚴嵩竊柄以至庚戌之危由江陵秉政以至黨議之興由魏璫稔惡以至流賊之破碎山河闔寺復用以至甲申狗難社稷淪亡於赤眉黃巾一切僉壬亂政傷心慘目之象皆先生所未睹記者使先生而在有不效屈子之行吟似賈生之流涕綜一代興亡之顛末寄之一唱三歎者乎乃先生不能留其身於百年後以輯明詞而其心則昭然若揭也予亦第爲先生抒其不容已之心而已代斲傷手誚奚容

謂已得古人之旨也故曰不欲梓者余之心也嗣是歸里暇日猶數易稿請正先大人大人命匠計工亟圖授梓緣辛酉以前余事制舉菽未得全力搜討及于役梧江匏繫雞肋校讎無人授梓之意終不果而先子遂於辛未見背矣徒跣奔旋雞骨支牀潦倒疾病諸事俱廢遷延又十九載今自顧鬚髮霜盈桑榆影逼倘過此不能付梓成書懼無以見先人於地下而謂予能已於授梓乎昔龍門馬遷繼父談書不忘執手之泣扶風班固就父彪業克成漢史之詳思廉表遺言而續梁陳二書延壽終先志而撰南北二史古人著書堂構相承比比然矣余不才去古人何啻天淵而其不忍忘先人之心

與先人望予之心則一也乃今閱三十七年而始謀授梓方以曠日滋戾而猶敢逡巡乎哉故曰不能不梓者余仰體先大夫之心也獨是前後兩書註成授梓有期其於闡發勸懲之旨未知果能仰酬先志與否而歲月遷移先大夫不獲目擊校正則撫編摩挲是又余之滋感也夫

康熙四十九年庚寅嘉平月漢陽張仲璜別麓題

先王父汲古嗜學於書無所不讀尤邃於史簿書之暇手不停披宦遊所至未嘗不以全史自隨生平訓子弟必援据史傳舉古忠臣孝子以爲法嘗謂升菴先生彈詞一書言簡而義該其入人也深其感人也易一唱三歎有遺音者矣顧其書終於元末間采明紀續勒成編猶恐讀之者之習其詞而遺其事聆其聲而昧其義也命先君子博採羣書合正續二編細加註釋片言必揭其詳軼事必探其要夫而後人人可讀彈詞不啻人人與讀全史矣書成藏棄家塾者三十年先君子解組歸里檢閱刊行江漢人士珍賞同心購求者如布帛菽

栗馬

坦麟

奉使兩淮重授之梓敢云肯構亦使先

人津逮後學一片苦心差共質於海內也自惟鈍拙無似蚤玷科名通籍以來過庭之訓尊聞行知闕焉未逮兩世遺編亦未由繼述而是書則幼而學之凡忠臣之所以事其君孝子之所以事其親與夫廟朝之上問巷之間一切可歌可泣可興可觀者胥於是乎在先入之言主之久矣頃以菲材辱

聖天子知遇隆恩不次擢用委任皆繁劇及財賦重地辨明而起夜分而寐束書不暇觀覽而古今成敗利鈍時隱隱心目間即所以進思盡忠退思補過

師先王父與先君子服官莅政之道於萬一以幸
免於罪戾者亦胥於此書是賴刻成之日展卷撫
然手澤如存謹跋數語於卷末以識不忘云時

雍正五年四月朔日孫男

坦麟

敬書於維揚之茱

萸灣舟次

彈言後記

廿一史彈詞註卷之一

成都楊 慎用修編著

漢陽張三異禹木增定

男仲璜別麓註 孫坦含坤章

伯琮鶴湄訂 坦麟畫臣

叔珽鵠巖叅 坦驄青御

坦熊男祥仝校

第一段 總說 西江月

天上烏飛兔走人間古往今來沉吟屈指數英才多少
是非成敗 富貴歌樓舞榭淒涼廢塚荒臺萬般回首
化塵埃只有青山不改 詩曰

爲愛青山日倚樓白雲紅樹兩悠悠秋鴻社燕催人
老野草閒花徧地愁

野草閒花徧地愁龍爭虎鬪幾時休舉頭吳越齊秦
楚回首梁唐晉漢周槩世盡從忙裏老誰人肯向死
前休賢愚千載知誰是滿眼蓬蒿共一邱

八句罷談詩少賣且將今古事評論詩詞只可譚風
月今古還堪警世人博覽經書尋典故傍搜史傳綴
新文零裁錦繡篇篇好碎剪冰霜字字精按捺奸邪
尊有道讚揚忠孝獎賢能丁當擊玉敲金字剔透蟠
龍繡虎紋清似釣舟聞夜雨壯如軍壘發秋聲助添
豪傑英雄氣感動忠臣烈士心短舞長歌思妙曲高

山流水待知音當塲告稟知音者忙裏偷閒試一聽
竊聞誦詩讀書要知今古撫琴彈劍須待賞音昔者太
極初分鴻濛始判有大聖人盤古出世能明天地之道
達陰陽之變爲三才首君自後三皇五帝世代相傳按
史記盤古之後有天地人三皇春秋元命苞曰開闢以
來至春秋魯哀公十四年獲麟之歲凡一百二十六萬
七千年分爲十紀索隱曰凡三百二十七萬六千年分
爲十紀雖有參差大槩是世遠不能詳考不必細推但
要知所謂十紀者

九頭紀

五龍紀

攝提紀

合雒紀

連通紀

敘命紀

循蜚紀

因提紀

禪通紀

疏仡紀

自人皇氏至敘命氏凡八十三君又一書云一百八十
三君十紀之最著有所謂

有巢氏 燧人氏 伏羲氏 女媧氏 柏皇氏

中央氏 大庭氏 栗陸氏 驪連氏 渾沌氏

赫胥氏 尊盧氏 昊英氏 朱襄氏 葛天氏

陰康氏 無懷氏 共工氏 神農氏 有熊氏

此等皆係上古世稱伏羲為太昊在位一百一十五年神農為炎

帝在位一百一十年軒轅為黃帝在位一百一十年謂之三皇繼之以少

昊在位八十年顓頊在位七十八年高辛在位七十年唐堯在位七十二年虞舜

在位四十八年謂之五帝

墳按雙湖胡氏曰三皇之號昉於周禮外史掌三皇

何所本至宋五峯胡氏直斷以孔子易大傳以伏羲神農黃帝堯舜為五帝不信傳而信經其論始定渭上南軒著資治通鑑前編首列三皇五帝辨疑亦本之易參之胡氏以定五帝之世則三皇即天皇地皇人皇之號五帝之名當以伏羲神農黃帝堯舜為是胡一桂字廷芳婺源人號雙湖先生孔安國字子固作書傳漢諫議大夫宋追封曲阜伯胡宏字仁仲稱五峯先生

三皇五帝始有文字相傳堯讓舜舜讓禹那時知有義讓不知有爭莊子曰君如標枝民如野鹿風俗淳美敦樸此後禹傳家湯放桀武王伐紂所以干戈競起詭詐日生自此五霸爭強以至春秋列國互相吞併千有餘年按元會運世圖云邵子以自有天地至於窮盡謂之一元一元有十二會一會有一萬八百年盤古三皇正在寅會中自寅會算一度至午會星一度該四萬五千餘年正唐堯起甲辰時也夏

禹王治世先天六會已過時當午會陽極陰生所以治
日常少亂日常多應後天六會也至於七國爭雄強秦
獨霸楚漢爭鋒王莽篡朝奸雄逞志陰盛陽衰之氣候
雖有聖人復起無可奈何後來光武中興三分割據五
胡雲擾六代瓜分南北相吞隋唐混一流傳五代粉碎
中原宋太祖纔得削平又有遼金西夏虎狼蛇蝎展轉
相吞直至元朝暫時寧帖上下十九史按夏禹八年甲
子至今洪武十七年甲子凡三千六百年夏商周三代
共占一千九百年中間自魯隱公元年己未入春秋至
哀公十四年庚申凡二百四十二年哀公十五年辛酉
至周烈王二十三年戊寅入通鑑至五代之末己未共

一千三百六十二年宋太祖另起不在通鑑者又四百
年至元末中間賢愚不等善惡不同是幾箇一場創業
開基幾箇一場龍爭虎鬪誰弱誰強誰是誰非恰似一
枕南柯都打入漁樵話裏今將歷代史書大略編成一
段攢十字詩詞雖然言語粗疎僅可略知大槩少資談
論以奉知音

盤古生一出世初分天地

相傳首出御世者曰盤古氏生於大荒莫知其始明
天地之道達陰陽之理是爲三才首君周靜軒曰盤
古氏出由是天地始爲天地

人物始爲人物而混茫開矣

璜按鍾伯敬補輯捷錄亦主周說謂盤古始分天地
人物近日朱青巖綱鑑輯畧云盤古之時庶類漸繁
設無統御何成世道盤古首出而明天尊地卑之義
以君臨天下故俗傳曰盤古分天地不兼言分人物

雖與周說不同然萬世君道之立
自盤古始語不荒唐此較近理

至三皇傳五帝漸剖乾坤

盤古既立君臣之道自此而聖作物觀至三皇傳五
帝而氣運日開文明日啓 三皇五帝名號註見前

天皇氏定干支陰陽始判

天皇取天開於子之義一姓十三人始制干支之名
十干曰開逢甲旃蒙乙柔兆丙疆圉丁著雍戊屠維
已上章庚重光辛元默壬昭陽癸十一支曰困敦子赤
奮若丑攝提格寅單闕卯執徐辰大荒落巳敦牂午
協洽未涒灘申作噩酉闔茂戌大淵獻亥其歲紀以
攝提爲首以定歲之所在而陰陽始判 闕音謁默
音亦牂音莊涒
音吞噩音岳

地皇氏明氣候序列三辰

地皇取地闢於丑之義一姓十一人爰定日月星三
辰分晝夜以三十日爲一月十一月爲冬至鈞旋轡
轉周而

人皇氏相山川君臣定位

人皇取人生於寅之義一姓九人相厥山川分爲九區主不虛王臣不虛貴政教君臣所自起飲食男女所自始

有巢氏辨人獸物類區分

太古之民穴居野處與物相友迨後爪牙角毒物始爲敵有巢氏構木爲巢教民居之以避其害飲禽獸之血而茹其毛取其皮以蔽前後

燧人氏治熟食鑽燧取火

民未知熟食燧人氏作觀星辰而察五行知空有火麗木則明於是始鑽木取火別五木以改火春取榆柳之火夏取棗杏之火夏季取桑柘之火秋取柞櫟之火冬取槐檀之火教民烹飪免腥臊而民利之

女媧氏補蒼天復立崑崙

共工氏與祝融氏戰不勝而怒乃頭觸不周山崩天柱折地維缺女媧氏鍊五色石以補蒼天闕斷鰲足

以立四極淮南子注云天不足西北故補之天廢傾以鰲足柱之十洲記云崑崙在西北故補之天廢傾

地去岸十三萬里山高平地三萬六千里出日月之上乃天地之根紐也神異經云崑崙有銅柱其高入

天所謂天柱也圍三千里圓周如削銅柱下有迴屋焉辟方百丈郭璞贊曰崑崙月精水之靈府惟帝下

都西羌之字嶸然中峙號曰天柱此共工名康回非堯時共工也今鄖陽府竹山縣有女媧山相傳煉

石補天處郭璞字景純聞喜人得青囊書九卷洞知五行天文卜筮之術晉元帝以爲著作郎

璜按共工氏身即長大安能頭觸山崩况山海經云西海之外崑崙山西北有山名曰不周是不周山在

崑崙之西北不周即崩安能並崑崙之天柱而俱折耶荒唐甚矣又按羅氏路史謂外紀載煉石補天非

真有是事也是時共工傲亂天常肆殃下土女媧戮共工以祛害都於中皇之山是謂女皇本紀謂其功

高而充三皇地平天成不改舊物則其復天常而奠地維其功大矣後人頌之謂之補天猶所謂旋乾轉

坤補天浴日云爾豈乾坤真可旋轉天日真可補浴哉宋羅泌字長源廬陵人有路史行世

有名號泯相承循蜚疏仡

次民氏雖世次可紀而事不經見疏佗紀則自黃帝以迄於周

說赫胥談栗陸槩出傳聞

赫胥栗陸禪通紀中之二氏也赫胥之世人居不知所為行不知所之栗陸傲復自用其臣東里子諫而被殺天下叛貳栗陸遂亡十紀自五龍紀五氏至疏佗紀帝摯皆出荒史故謂傳聞

紀年數云三百二十七萬

自天地開闢至魯哀公十四年凡三百二十六萬七千年分為十紀

掌世界共一百八十餘君

自九頭紀至敘命紀共一百八十三君

伏羲氏木德王始畫八卦

伏羲生於成紀以木德王故風姓時有龍馬負圖出河其文後一六前二七左三八右四九中五十帝仰

引言言卷一
觀象於天俯觀法於地中觀萬物之情始畫八卦卦有三爻因而重之為卦六十有四以通神明之德而卜筮從此生焉索隱曰木德春令故易稱帝出於震月令孟春其帝太昊是也成紀地名漢置成紀縣今省入秦州屬鞏昌府

通婚姻制琴瑟禮樂繇興

上古男女無別帝始制嫁娶以儷皮為禮正姓氏通媒妁以重人倫民始不瀆而禮由是興又斷桐為琴繩絲為絃絃二十有七絙桑為三十六絃之瑟而樂由是興

造書契代結繩命臣蒼頡

天雨粟鬼夜哭鑿破蒙荒

上古未有文字大事則大結其繩小事則小結其繩以記之帝造書契刻木畫字以代結繩之政書制有六一曰象形二曰假借三曰指事四曰會意五曰轉註六曰諧聲使天下義理必歸文字天下文字必歸六書是時天

有畫而無文也外紀以史皇氏爲蒼帝名頡創文字
蒼頡時靈龜負書丹甲青文蒼帝受之掌指而創文
字鬼爲夜哭又謂黃帝命蒼頡爲左史頡見鳥獸蹄
迹之跡體類象形而制字字爲六義升菴以蒼頡爲
伏羲臣俱不可考王充嘗辨雨粟鬼哭之妄云蒼頡
制文字天地出圖書乃聖明之瑞何非何惡而鬼爲
之哭漢書緯書云乃兔夜哭憂其毫將爲筆也 蒼
頡南樂人
有四目

神農氏火紀官教民耒耜

古之王者易代改號取法五行更旺相生太昊首以
木德王神農以火德王故曰炎帝神農氏帝以火紀
官春官爲大火夏官爲鶉火秋官爲西火冬官爲北
火中官爲中火古者民茹草木之實食禽獸之肉未
知耕稼帝乃因天時相地宜擇五穀之種斲木
爲耜揉木爲耒始教民藝五穀而農事興焉

作方書嘗百草救濟生靈

帝徧味草木察其寒溫平熱之性辨其君臣佐使之
義嘗一日而遇七十毒神而化之作方書以療民疾

咨於岐伯作內經命俞跗岐伯雷公察明堂究息脉巫彭桐君處方餌由是民無夭扎而醫道立焉

軒轅氏制舟車阪泉三戰

帝姓公孫國於有熊生於軒轅之邱因名軒轅始制器用命共鼓化狐剗木爲舟剗木爲楫以濟不通邑夸作大輅以行四方由是車制備服牛乘馬引重致遠而天下利矣神農氏衰諸侯相侵伐炎帝榆罔不能制軒轅習用干戈以征不享諸侯咸來賓從榆罔欲侵陵諸侯軒轅修德振兵以與榆罔戰於阪泉之野三戰然後得其志阪泉地名今延慶州有阪山云軒轅戰阪泉處軒轅邱在開封府新鄭縣有熊即新鄭

璜按史稱軒轅與榆罔阪泉三戰當時蚩尤攻榆罔於空桑軒轅徵師以誅蚩尤若又與榆罔戰則猶是蚩尤矣且炎帝是時避蚩尤之攻遜居涿鹿亦安能侵陵諸侯乎史載軒轅誅蚩尤還天下諸侯共尊爲天子以代神農氏因其有土德之瑞故號曰黃帝使三戰而後得志是以兵力取天下尚得爲五帝之世耶

擒蚩尤涿鹿野妖霧開昏

蚩尤炎帝之裔作刀戟大弩攻榆罔於空桑榆罔遜
居涿鹿軒轅乃徵師諸侯與蚩尤戰蚩尤作大霧軍
士皆迷軒轅作指南車以示四方遂擒殺蚩尤於涿
鹿指南車車上有樓刻仙人於上車雖迴轉手常
指南或曰車上用子午盤針以定四方蚩尤塚在
東平州常有赤氣出名蚩尤旗涿鹿今順天府涿州
空桑地名今開封府陳留縣

命大撓及容成曆編甲子

帝立星官命大撓占斗綱所建以十干配十二支作
為六十甲子相配以名日而定之以納音又命容成
作蓋天著周天曆度作調曆以建寅正月為歲首復
迎日推策作十六神曆積邪分以置閏於是時惠而
辰從矣蓋天即渾天儀也邪音餘

制冕裳造算數律建伶倫

帝始作冕垂旒充纁為元衣黃裳以象天地之正色
旁觀翬翟草木之華染畫五采為文章以表貴賤命

隸首作算數定數以率其羨要其會而律度量衡
是成也又命伶倫取竹於嶰谿之谷長九寸圍九分
而吹之為黃鐘之宮又制十二筩以象鳳凰之鳴而
別十二律其雄鳴為六雌鳴亦六以比黃鐘之宮生
六律六呂候氣之應以主宮商角徵羽之聲
九章算法也律律呂也陽六為律陰六為呂黃鐘太
簇姑洗蕤賓夸則無射陽聲也大呂夾鐘仲呂林
鐘南呂應鐘陰聲也嶰谿在崑崙山北
鞞音揮

金天氏誕星虹諸祥畢至

金天氏姓己名摯黃帝之子元囂也帝以金德王位
在西方象曉日之明故號少昊金天氏母曰嫫祖感
大星如虹下臨華渚而生帝即位後五鳳適至
元鳥遺書長庚輝日后土錫符諸祥之物畢至

九黎亂巫史起恐動人神

少昊氏衰黎氏九侯亂德民神襍揉不可方
物家為巫史無有要質民瀆於祀禍災荐臻
璜按少昊乃一代之通稱後世始
衰非少昊金天帝之世即衰也

頤頤氏命五宮無為而台

號顓頊高陽氏帝以少昊之子重為木正曰勾芒該
為金正曰蓐收修及熙相代為水正曰元冥以炎帝
之子為土正曰勾龍帝之孫黎為火正曰祝融是時
九黎之亂既革神人不襍物序民安帝無為而治焉
張晏曰高陽高辛皆因受封所興之地為氏顓頊
帝嚳皆以名為號上古質樸故也高陽縣名今屬保定府古跡有高陽城顓頊所築今開封府杞縣亦有
高陽城乃高陽氏封此也顓頊音蓄張晏字子傳中山人著有西漢音釋四十卷

高辛氏有四后俱產奇兒

帝嚳高辛氏姬姓名姁受封於辛故號高辛氏帝有四后后有邠氏女曰姜嫄生棄其後為周次妃有娥氏女曰簡狄生契其後為商三妃陳鋒氏女曰慶都生堯是為陶唐氏四妃姬訾氏女曰常儀生摯帝崩子摯嗣立
姁音親姬音疽

唐堯氏智如神存心天下

帝姬姓帝嚳之子帝摯之弟年十三受封於陶年十五復封於唐為唐侯故號陶唐氏摯尸位九年而廢

引言言一

諸侯尊弟放勳踐位平陽以火德王家語曰陶唐帝其仁如天其智如神就之如日望之如雲說苑曰帝

存心於天下加志於窮民

陶唐

今太原府清源縣東南有陶唐城

璜按太史公以放勳重華文命為堯舜禹之名孔安國書傳則以堯舜禹為名蔡氏書傳謂放勳重華文

命皆稱述功德之詞至馬融諸儒乃以堯舜禹為謬矣應以安國之說為是

蔡沉字仲默元定子作

書傳從

祀孔廟

命羲和欽曆象觀覽星辰

帝不忘重黎之舊使其後復典之是謂羲和氏命以欽若昊天曆象日月星辰分為四序敬授人時羲仲

居嵎夸理東作以殷仲春羲叔居南交理南訛以正

夏至和仲居昧谷理西成以殷仲秋和叔居朔方理

朔易以正冬至既已四時推候皆合矣積一期而天

有餘度歲有餘日於是又置閏法以閏月定四時成

歲

嵎夸南交昧谷朔方四方至極之地蓋官在國都而測候之所在四方也

設契俞祈修蛇廷主冀夷

皆為民害帝使羿繳大風於青邱之澤上射十日下
射猋猋斷修蛇於洞庭擒封豨於桑林時有草生於
庭曰莫莢十五日前日生一葉十五日後日落一葉
月小盡則一葉賦而不落觀之可以知旬朔又名曆
草猋猋獸也封豨大豕修蛇長蛇也大風風伯也
青邱澤名在青州府樂安縣境內
齊景公畋於青邱即此
莢音劫

璜按趙雪航曰堯時豈有十日焦禾之妖況日在天
離地萬里雖千鈞之力豈能射及萬里之日乎且日
火也雖中安能滅之蓋淮南王與賓客方士作內外
書此言出於外書鴻烈解作史者收於外紀荒唐之
言豈可
為實

訪異位揚側陋釐降娥英

帝以年老丹朱罷訟不可授以天下乃授許由由不
受乃訪異位之人於四岳曰明明揚側陋岳口有鰥
在下曰虞舜帝曰我其試哉乃釐降二女娥皇女英
於瀉汭嬪於虞瀉汭水在今蒲州源出歷山下流
入於河許由字武仲登封人瀉音規汭音芮水南
流者為瀉北流者為汭東西相距二百里合流入黃

河

虞舜氏起歷山躬行孝弟

舜生於姚墟居於瀉汭虞其有國之號故號有虞氏
母握登氏死繼母生弟象父瞽瞍頑母嚚弟傲嘗欲
殺舜舜克盡孝弟之道年二十以孝聞耕於歷山人
皆讓畔漁於雷澤人皆讓居陶於河濱器不苦窳一
年所居成聚二年成邑三年成都三十乃登庸姚
墟在東昌府濮州歷山山西平陽府蒲州有歷山又
山東東昌府濮州亦有歷山為舜耕處舊有廟碑碣
尚存以濮州歷山為是雷澤蒲州首陽山下有雷澤
又山東兗州府曹州亦有雷澤史記謂舜漁於此亦
當以曹州為是又曹州定陶西南有陶邱亭相傳為
舜陶處

罪四凶登元愷觀獄歸仁

帝鴻氏子曰渾沌是為驩兜少昊氏子曰窮奇是為
共工顓頊氏子曰檮杌是為鯀縉雲氏子曰饕餮是
謂三苗謂之四凶舜放驩兜於崇山流共工於幽州

叔達天下謂之八愷高辛氏有才子八人伯奮仲堪叔獻季仲伯虎仲熊叔豹季狸天下謂之八元此十六族世濟其美舜舉八愷使主后土舉八元使敷五教天下咸服其明及堯崩舜避堯子於南河之南天下朝覲訟獄者不之丹朱而之舜舜歸乃格於文祖即帝位 崇山南裔今岳州府慈利縣幽州北裔今奉天府遼陽地羽山東裔今淮安府贛榆縣三危西裔今陝西肅州衛有三危山 饕餮音滔鐵散艾平聲戴音引

彈五絃歌南風阜財解愠

舜恭已無爲彈五絃之琴歌南風之詩而天下治其詩曰南風之薰兮可以解吾民之愠兮南風之時兮可以阜吾民之財兮 絃絲屬長三尺三寸六分先制五絃後加文武二絃爲七絃

躬巡狩崩蒼梧禹避陽城

舜薦禹於天命禹攝政總師舜南巡狩崩於蒼梧之野禹避舜之子商均於陽城天下歸禹乃即位 蒼梧山名一名九嶷在永州府寧遠縣 陽城今河南府登封縣 嶷音夸

璜按家語史記皆言舜南巡崩於蒼梧之野葬焉南
軒據孟子曰卒於鳴條謂無南巡之說舜既命禹攝
天子矣胡爲又自遠巡南裔禹既宗舜矣胡爲聽
其遠葬而不歸觀於北都也應以崩鳴條爲是

崇伯子蓋前愆九疇錫洛

帝堯時洪水爲患堯咨四岳有能俾乂四岳舉高陽
氏子伯鯀堯命爲司空封鯀爲崇伯使治水九載績
用弗成舜殛鯀於羽山舉禹使續父業胡氏曰禹傷
父以治水殛死故直以此自任卒之建立偉績克蓋
前愆前編曰禹非惟克勤於邦以爲忠而補前人之
愆以濟天下乃所以爲大孝也時神龜出洛負文列
於背有數自一至九禹因而第之以成九類關子明
曰洛書之文九前一後三左七右四前左二前右八
後左六後右洛水一名洛汭在河
南府城南經偃師宜陽永寧鞏縣界
璜按圖書俱出伏羲之世至禹時又因神龜負文
而衍其義爲九章大法非至禹時而洛書始出也

奠山川作貢賦天地平成

禹平水土奠高山大川水患旣息任土作

禹以五音聽治懸鼓鐘磬鐸輅以待四方之士曰導以道者擊鼓諭以義者擊鐘告以事者振鐸啓以憂者擊磬有訟獄者搖輅出見罪人下車問而泣之左右曰罪人不順道何為痛之禹曰堯舜之人皆以堯舜之心為心寡人為君百姓各自以其心為心是以痛之

鑄九鼎象方物天雨黃金

左傳王孫滿曰昔夏之方有德也遠方圖物貢金九牧鑄鼎象物而為之備使民知神姦胡氏曰左氏以為鼎者圖象百物而為之備誣矣禹所鑄者別九州之分野差田土之高下定貢賦之式度立井田封建之經界鑄於鼎以為萬世準耳贊寧要言曰禹鼎不止圖山川猛鷲之物每州民戶暨地里寬狹皆可知也故得九鼎知九州戶籍圖書所以

歷代寶之歟是時天雨黃金三日
璜按後世銘功鐘鼎之象義木乎此

龍負舟一死生蠃蚌齊視

集會稽戮防風萬國咸寧

禹濟江黃龍負舟舟中人懼禹仰天歎曰吾受命於天竭力以勞萬民生寄也死歸也予何憂於龍視龍猶蜉蝣顏色不變須臾龍俛首低尾而去在壁曰蜉蝣草上曰蜉蝣江水出今茂州岷山合漢入海

禹即位後會諸侯於塗山承唐虞之盛執玉帛者萬國後八歲會諸侯計功於越命曰會稽防風氏後至禹戮之禹崩於會稽因葬焉會稽縣屬今紹興府防風氏國今湖州府武康縣塗山今鳳陽府

堯讓舜舜讓禹相傳有道

堯舜禹以天下相讓禪蓋聖人大公無我惟有道者傳之耳

為生靈輸苦役非戀尊榮

堯舜禹以愛天下為心無所繫念於其間所謂五帝公天下也

從此後禹傳家子承父業

啓賢能敬承繼禹之道

所謂三王家天下也
三代至今皆傳子矣

夏后氏四百年一十七帝

夏自禹至桀凡一十七主
共天下四百五十八年

殷湯氏三十帝六百餘春

湯建國號曰商後盤庚改爲殷自湯至
紂凡三十主共天下六百四十四年

成周氏八百年三十七世

周自武至赧王凡三十七
主共天下八百六十七年

九州中諸列國併入強秦

周室旣衰七雄各霸秦始皇
滅二周而吞六國遂有天下

秦無道十五年止傳二世

秦始皇十二
年二世三年

六國人併楚漢起義爭衡

燕韓趙魏齊楚爲六國又楚
項羽漢劉邦俱起兵攻秦

漢高祖定江山一十三帝

高祖平秦滅楚而定天下傳至
孺子嬰凡十三主是爲西漢

二百年遭王莽篡國酈君

西漢共天下二百一十年王莽酈
平帝弑孺子嬰篡位一十八年

漢光武復中興一十二帝

光武誅莽中興傳至獻
帝凡十二主是爲東漢

二百年劉備起漢室三分

東漢共天下一百九十五年獻帝崩昭

蜀魏吳為三國蜀漢正統四十三年漢亡又十六年
吳亡武帝時陳壽撰三國志魏志三十卷蜀志十五
卷吳志二十卷陳壽
字承祚巴西安漢人

漢歸曹吳入晉取次銷沉

漢降於曹曹禪於晉晉又滅吳而天下始盡歸於晉

司馬晉五十年五胡大亂

晉自司馬炎有天下傳至愍帝凡四主共五十三年
是為西晉其時五胡擾亂懷愍先後蒙塵五胡者鮮
卑匈奴氐羌羯五等胡人也
氐音邸又音低羌音腔羯音結

走江東承舊統百歲雲奔

西晉亡司馬睿渡江即位傳至恭帝
凡十一主共一百零四年是為東晉

南北朝兩相持不能混一

宋齊梁後梁陳為南朝元魏
西魏東魏北齊後周為北朝

氣相吞力廝併一百餘春

南北兩朝共一百六十九年

宋齊梁傳陳國俱都江左

宋劉裕篡晉傳八主六十年齊蕭道成篡宋傳七主
二十四年梁蕭衍篡齊傳四主五十六年陳陳霸先
篡梁傳五主三十三年俱都金陵又後梁蕭詧稱帝
江陵傳三主三十年隋滅之金陵今江南江寧府
上元縣江陵今
荊州府江陵縣

索頭魏分齊周北地稱尊

元魏拓拔珪匈奴索頭沙漠汗之後傳十六主一百
六十年孝武時高歡奉靜帝居鄴都為東魏宇文泰
奉文帝都長安為西魏後歡子洋奪東魏為北齊泰
子覺奪西魏為後周北齊傳五主二十六年後周傳
五主二十八年索頭鮮卑別部也姓拓拔氏其俗

府長安縣

周併齊隋篡周平陳一統

周武帝滅齊隋楊堅篡周又南平陳後主而天下一統盡歸於隋矣

四十年彈指過海內風塵

隋自楊堅傳至恭帝凡三主三十八年

唐高祖立根基二十一帝

唐李淵受隋禪而有天下傳至哀帝凡二十一主

三百年捱不到付與朱溫

唐共二百八十九年為朱溫所滅

朱溫起號梁朝歸於李氏

後梁朱溫共十六年為唐李存勖所滅

李唐亡石晉繼劉漢相承

唐李存勗前後四主共十四年為晉石敬瑭所篡晉兩主共十一年為北番所擄晉臣劉智遠乘晉滅稱帝為漢父子共四年

郭氏周緊相連通稱五代

後周郭威滅漢無嗣傳妻兄子柴榮凡三主二姓共十年合梁唐晉漢周謂之五代

五十年十三帝流水浮雲

五代起梁朱溫終周恭帝凡十三主共五十三年

宋太祖占中原無多日月

宋太祖趙匡口受周禪而有天下在位十七年

西北邊遼金夏不住相爭

大遼太祖耶律阿保機傳至宣宗凡十主二百一十

中間又有西遼耶律大石因大遼滅而稱帝傳至天
禧帝凡五主
七十年

三百載十八君汴杭閩廣

宋自太祖至帝昺凡十八主共三百一十七年都汴
為北宋自高宗南渡都杭州為南宋後帝昺航海至
閩廣而亡
汴今河南開封府杭今浙江杭
州府閩今福建福州府廣今廣東廣州府

到頭來元世祖一鼓而吞

宋亡天下
歸於元矣

胡元氏併宋金中華一統

元蒙古人姓奇渥溫氏世祖忽必
烈併宋平金混一南北而有天下

急慌慌忙過了九十三春

元自世祖至順帝
凡十主九十年

廿一史笑談間從頭數徧

司馬遷史記班固漢書范曄後漢書陳壽三國志唐
太宗晉書沈約南宋蕭子顯南齊姚思廉梁書陳書
李百藥北齊魏收北魏令狐德棻周書魏徵隋書李
延壽南史北史劉煦宋祁唐書歐陽修五代史元脫
脫宋遼金三史宋濂王禕元史謂之廿一史司馬
遷班固註見後史記漢書南史元嘉初范曄刪衆家後漢
句下班固爲西漢書南史元嘉初范曄刪衆家後漢
書爲一家之作又謂之東漢書唐太宗貞觀中詔太
子司議郎敬播與令狐德棻等撰晉書考證類例咸
出敬播齊沈約修南宋書裴子野刪爲宋略三十卷
言宋史者以裴略爲上沈書次之初江淹受詔爲齊
志沈約復著齊紀蕭子顯自表於梁武帝修齊書梁
史官姚察初錄梁陳事未就而陳亡隋文帝問之察
因以所議著篇成輒上奏又不克就且死屬子思廉
繼其業唐貞觀中思廉表父遺言有詔聽續因採謝
旻顧野王等諸書總括爲梁陳二書李德林在齊預
修國史創紀傳書二十卷至開皇中續撰增多至三
十八篇唐貞觀初敕其子百藥仍其舊錄襍採他書
演爲北齊書五十卷初齊天保中詔魏收修魏書收

恭帝爲紀及列傳合九十二篇令狐德棻爲唐秘書丞武德中建言唐承南北五代無正史請加撰次乃詔德棻陳叔達等共成周史唐貞觀中詔顏師古孔穎達修述隋史魏徵總其事序論皆徵作李延壽父太師嘗以宋齊梁陳同隋欲擬吳越春秋編年未就而卒延壽追終先志更依馬遷體總序八代北起魏盡隋二百四十二年南起宋盡陳一百七十年爲南北二史劉煦石晉宰相也因唐常述舊史增損爲帝紀二十列傳一百五十凡二百卷謂之舊唐書其書煩略不均是非失實至宋仁宗時詔歐陽修宋祁刪修唐史紀表志修主之列傳祁主之凡廢傳六十一增傳三百三十一志三表四謂之新唐書開寶中詔扈蒙與盧多遜等修梁漢周史史成而褒貶失真仁宗命歐陽修重加修定爲五代史元元統六年脫脫爲中書右丞相詔修宋遼金三史召翰林歐陽元爲總裁發凡舉例凡論贊表奏皆元屬筆明洪武中詔宋濂王禕修元史范梈字蔚宗順陽人沈約字休文武康人謚隱仕齊爲步兵校尉梁武帝受禪拜尚書僕射加侍中遷丹陽尹所著有晉書百卷南宋書齊紀梁武帝紀若干卷蕭子顯字景陽李百藥字重規定州人官宋正卿魏收字伯起曲陽人北朝官僕

射劉煦字日輝涿州歸義人宋祁字
子京號小宋謚景文歐陽元字原功

是和非長共短細有評論

要知就裏分明處

細簡殘篇著意聽

滾滾龍爭虎鬪匆匆走烏飛席前花影坐間移百歲
光陰有幾說古談今話本圖王霸業兵機要知成敗
是和非都在漁樵話裏西江月

明朝有意來相訪

綠水青山別是春

成都楊 慎用修編著

漢陽張三異禹木增定

男仲璜別麓註 孫坦含坤章校

第二段 說三代 南鄉子

攜酒上吟亭滿目江山列畫屏
賺得英雄頭似雪功名
虎嘯龍吟幾戰爭 一枕夢魂驚
落葉西風別換聲誰
弱誰強都罷手傷情打入漁樵話
裡聽 詩曰

混沌初分氣候淳
標枝野鹿看君臣
三皇五帝賓天
去辛苦閻浮世上人

世上生靈作業多
功名富貴反成魔
常懷杞國憂天

悶不見康衢擊壤歌仗劒提刀爭日月伏屍流血換
山河白頭釣叟秋江上笑指清鷗下碧波

詩出大才閒遣興話談今古便驚人沙金璞玉求良
匠流水高山待賞音玉在石中誰辨寶金藏沙裏未
爲真淘金必索披沙揀取玉須教破璞尋琴對子期
彈雅操馬逢伯樂長千金龍光未識思雷煥奇字難
知問子雲美酒要逢知己飲好詩須向會家吟講談
盡合周公禮褒貶咸遵孔聖文斷簡殘篇藏故典氷
絃玉軫播新聞高人滿座垂清聽始信書生用意深
適間提說歷代總要不曾開列君臣大體賢愚國運短

長流傳世次今將三星五帝之後定夏高傳文以正南

夏后氏者禹王受虞舜禪位為天子建有天下之號曰

夏

在位二十七歲

傳一十七帝其名曰

啓

在位九歲

太康

在位十九歲

仲康

在位八歲

帝相

在位十七歲

少康

在位十二歲

帝杼

在位七歲

帝槐

在位十六歲

帝芒

在位八歲

帝泄

在位六歲

帝不降

在位十九歲

帝扃

在位十一歲

帝廩

在位十一歲

帝孔甲

在位十一歲

帝皐

在位一歲

帝發

在位三歲

帝桀

在位十二歲

放於南巢天下歸商共享國四百五十

八年

商湯氏者代夏伐桀撫有天下

在位三十祀

傳三十君其名

曰

外丙

在位二祀

仲壬

在位四祀

太甲

在位十三祀

按孟子曰湯崩外丙二年仲壬四年史記曰湯在位十有三祀而崩太子太丁早卒次子外丙立二年仲壬立四年崩太丁之子太甲立程子曰古人謂歲為年湯崩時外丙方二歲仲壬方四歲太甲差長故立之今考皇極經世史無外丙仲壬名世且通鑑編年丁未三十祀王崩嫡孫太甲踐位戊申商王太宗太甲元祀湯以丁未崩甲以戊申立歷數甚明外丙仲壬之未嗣位不待辨矣

沃丁

在位十九祀

太庚

在位十五祀

小甲

在位十七祀

雍己

在位十二祀

太戊

在位七祀

仲丁

在位十三祀

外壬

在位十五祀

河亶甲

在位九祀

祖乙

在位十九祀

祖辛

在位十六祀

沃甲

在位十五祀

祖丁

在位十二祀

南庚

在位二年

易甲

在位五年

盤庚

在位二十九年

祖庚

在位七祀

祖甲

在位十三祀

廩辛

在位六祀

庚丁

在位十一祀

武乙

在位四祀

太丁

在位三祀

帝乙

在位十七祀

帝辛

在位十二祀

帝辛者紂也周師入衣

寶自焚天下歸周共享國六百四十四年

周武王者父曰文王紂時封為西伯至武王伐紂而有

天下

在位七年

傳三十七君其名曰

成王

在位十七年

康王

在位十六年

昭王

在位十一年

穆王

在位五十二年

共王

在位十二年

懿王

在位二十五年

孝王

在位十五年

夸王

在位十六年

厲王

在位十一年

宣王

在位十六年

幽王

在位十一年

平王

在位十一年

桓王

在位二十三年

莊王

在位十五年

釐王

在位五年

惠王

在位十五年

襄王

在位三十三年

頃王

在位六年

匡王

在位六年

定王

在位二十一年

簡王

在位十四年

靈王

在位十七年

景王

在位二十五年

悼王

無紀年

敬王

在位十四年

元王

在位六年

真定王

在位十八年

哀王

在位三月

思王

在位五月

考王

在位十五年

威烈王

在位十四年

安王

在位十六年

烈王

在位七年

顯王

在位十八年

慎靚王

在位七年

赧王

在位十九年

共享國八百六十七年天下歸秦通計三代共一千九

百七十年

夏禹商易周武爲三代開基定主各賢繼爲小康中興

之賢聖之君周自成康繼武宣王中興其餘者或長或短各有事迹今按史記寫入詞文

話說起三代君尊稱夏禹

三代夏商周也堯封禹於有夏故建有天下之號曰夏禹爲夏開基聖祖夏今山西平陽府夏縣

姓姒氏乃軒轅黃帝元孫

堯賜禹姓姒氏禹黃帝軒轅氏元孫軒轅生昌意昌意生顓頊顓頊生鯀鯀生禹於熒道之石紐鄉姒詞上聲一書云禹母吞薏苡而生因姓熒音薏

其父鯀帝堯時廷推治水

堯時洪水爲災四岳舉崇伯鯀可治水堯曰鯀方命圯族不可用岳曰試可乃已帝用之戒曰欽哉

爲無功身得罪殛死黃熊

鯀障洪水九載無功堯命舜殛於羽山人物
考云殛鯀投水化為黃熊因為羽淵之神

續父業任司空躬乘四載

鯀治水無功殛死舜舉禹使續父業任為司空禹傷
父功不成勞身焦思居外十三年水乘舟陸乘車泥
乘橈山乘欂隨山刊木奠高山大川 橈音敲形如
船而短小欂音菊以鐵為之形如錐長半寸施之履
下以
上山

娶塗山呱呱泣不顧私情

禹娶塗山氏女曰嬌生子啓辛壬癸甲啓呱呱而泣
禹弗子八年於外三過其門而不入嬌音驕呱呱音孤

淪濟漯排淮泗注江注海

禹疏九河淪濟漯排淮泗而注之海汝汝泗而注之
淮汝漢而注之江 濟水發源王屋山頂崖下名曰
沅水自沅而下伏於地中及其東出二源合流始名
為濟自是又伏流河中截河南出溢而為滎自滎而
下又伏而東流東北會青州之汶水又北東而入海

泗水縣陪尾山經曲阜崕陽濟河界入於海東流入
海漢水出嶓冢東流方名爲漢又東流則隨地得名
至於漢陽府大別山入江江水發源岷山東流至大
別與漢水會彭蠡溢出大江循南岸而行與江漢頡
頏趨海江居中曰中江漢自北岸入曰北江同入於
海

任九州作貢賦禪代爲君

初舜分天下爲十二州禹復爲冀兗青徐雍豫梁荆
揚之九州任土作貢庶土交正成賦中邦詳載禹貢
一書舜禪位於禹舜崩禹避舜之子商均於陽城天下歸禹乃即位

絕旨酒拜昌言下車泣罪

儀狄作酒禹飲而甘之曰後世必有以酒亡國者遂
疏儀狄絕旨酒人有昌言則拜之下車泣罪註見

一段泣
罪句下

敘九疇鑄九鼎鎮國安民

舜命禹敘洪範九疇敘疇語詳洪範篇九疇註
見一段錫洛句下九鼎註見一段九鼎句下

天與子啓承家兵征有扈

禹崩於會稽初禹薦益於天禹子啓賢能敬承繼禹
之道天下不歸益而歸啓曰吾君之子也啓乃即位
即釣臺以享諸侯有扈氏不服啓作甘誓召六卿征
之大戰於甘不勝六卿請復之啓曰不可吾地非淺
民非寡也今茲不勝是吾德薄而教不善也於是班
師琴瑟不張鐘鼓弗考不因席不仍味親親長長尊
賢委能隱神朞月而有扈服遂滅之孟子曰天與子
則與子釣臺在今河南開封府禹州嵎水之東扈

國今西安
府鄠縣

太康氏畋洛水五子歌聞

啓崩子太康立弟五人分封於衛以有窮后羿爲相
太康逸豫滅德盤遊無度畋於洛水之表羿拒之於
河不得入弟五人御其母以徯於洛之汭述禹之戒
作五子之歌一章言太康之失民二章言太康之遊
畋三章哀京師之不保四章痛故府舊章之論喪宗

縣洛水入河處

仲康氏討羲和陰鋤羿翼

太康尸位失國崩於陽夏太康弟仲康嗣位仲康以羲和黨惡於羿命口侯掌六師以討之翦羿羽翼故終仲康之世羿不敢逞也語詳書口征陽夏今開封府太康縣

帝相氏被寒浞弑逆亡身

仲康傳子相徙都商邱依同姓諸侯斟灌斟鄩氏羿自遷於窮石用寒浞浞娛羿於田逢蒙殺羿而烹之浞自立浞因羿室生澆及豷後浞使澆滅斟灌斟鄩氏弑相商邱縣名屬歸德府斟灌故城在青州府壽光縣斟鄩故址在萊州府濰縣寒國名浞封此有寒亭古蹟鄩音尋浞音足澆音梟論語作羿豷音係

少康氏滅澆豷鑾輿反正

初相被弑后緡方娠逃出自竇歸於有仍生少康少康年四十一舊臣靡自有鬲氏收灌鄩之燼討浞誅之立少康尋使臣女艾滅澆於過使太子季杼滅豷於戈乃歸故都夏道復興有仍國名緡后名有仍

國君之女也靡夏舊臣名鬲
過戈皆國名鬲音格杼音苧

一成田一旅衆靡致中興

初少康居仍爲仍牧正澆使其臣椒求之逃奔有虞
爲虞庖正虞君思妻以二姚而邑諸綸有田一成有
衆一旅能布其德而兆其謀以收夏衆撫其官職謀
中興焉卒賴舊臣靡討浞伏誅奉王踐位復禹舊績
夏道復興諸侯畢朝胡氏曰少康靡鬲經營四十年
然後克殄元凶祀夏配天不失舊物此真可謂中興
者矣故唐虞世南論歷代中興之主以少康爲冠
方十里爲成五百人爲旅虞商均所封之國思虞君
名姚虞姓二女妻少康也
綸邑今平陽府滎河縣

再傳至七朝君三回甲子

少康傳七代一百四十八
年俱能帥禹以興夏道

杼槐芒泄不降以至扃廛

杼少康子槐杼之子芒槐之子泄芒之

孔甲不降之子厘崩孔甲嗣位時天降二龍劉累學擾龍於豢龍氏能飲食之賜氏曰御龍龍一雌死潛醢以食王王使求之懼而遷於魯大紀曰王好鬼神事肆行淫亂作破斧之歌是為東音諸侯化之夏政

始衰
魯今汝州
魯山縣
醢音海

又相傳復二紀臯發因循

孔甲傳子臯在位十一年
臯傳子發在位十三年

至履癸號桀王荒淫無道

履癸發之子也是為桀力能申鐵鉤索負恃有力不務德而武傷百姓有趙梁者教桀無道勸以貪狠行淫縱樂謚法
賊人多殺曰桀

造瓊宮寵妹喜塗炭生靈

時諸侯或不朝桀伐蒙山有施氏有施氏進女妹喜王嬖之為之為瓊宮象廊瑤臺玉牀罷民力殫民財

爲肉山脯林酒池糟隄縱靡靡之樂一鼓而牛飲者
三千人以爲戲劇諸侯韋氏顧氏昆吾氏黨桀爲惡
恣行亂政以虐其民
蒙山今青州府蒙陰縣

十七帝統江山子承父業

自禹至桀共
一十七帝

四百年紅日落禹跡無聞

夏有天下四百五十八年桀無道關龍逢諫曰君用
財若無窮殺人若不勝民惟恐君之後亡矣桀曰吾
有天下猶天有日日亡吾乃亡矣囚逢而殺之書曰
方行天下至於海表以陟禹之跡
龍逢安邑人

商湯氏順民心鳴條伐夏

湯名履又名天乙主癸之子契之後也時桀無道民
心歸湯湯以伊尹爲相尹說湯伐夏救民費昌爲御
與桀戰於鳴條應天順人代夏而有天下建國號曰
商
鳴條在平陽府安邑縣張晏曰禹湯皆字也

且召庚生子壬天掌牧月命

為司徒敬敷五教
商今西安府商州

十四世乃生湯南巢放桀

契生昭明昭明傳相土昌若曹圉冥振微報丁報乙
報丙主壬主癸生湯共十四世湯伐桀桀曰吾悔不
殺湯於夏臺及戰敗走入於三股之國湯師從之桀
奔南巢因放焉後三年死於亭山其子淳維妻其眾
妾遁於北野隨畜轉徙號葦育逮周曰獫狁漢書句
奴傳曰其先伯禹苗裔蓋本此也
三股國名今山

東定陶有三股亭南
巢今巢縣
股音宗

禱桑林祈雨澤祝網施仁

時大旱七年太史占曰當以人禱湯曰吾請雨者為
民也若必以人吾請自當遂齋戒剪髮斷爪素車白
馬身嬰白茅以為犧牲禱於桑林之野以六事自責
曰政不節與民失職與宮室崇與女謁盛與苞苴行
與讒夫昌與言未已大雨方數千里初湯見人張網
四面祝之曰從天墜者從地出者從四方來者皆罹
吾網湯解其三面更祝曰欲左者左欲右者右欲高
者高欲下者下不用命者入吾網漢南諸侯聞之曰

湯德至矣仁及禽獸歸之者四十餘國南軒曰史記有剪髮斷爪身為犧牲之說夫以湯為民籲天之誠自能格天致雨何至信其人禱之說而毀其爪髮乎或出野史謬談不可信也桑林在鳳陽府亳州一云在澤州陽城縣世傳湯禱雨於此至今多桑

發莊山金鑄幣賑民困乏

伊尹言於湯發莊山之金鑄幣賑民救民之無食賣子者民始不困幣錢也

懷萬邦新其德自勒盤銘

湯伐桀有慙德左相仲虺作誥以釋之曰德日新萬邦惟懷湯之盤銘曰苟日新日日新又日新

舉伊尹任阿衡扶持太甲

湯在位十三年崩太子太丁早卒立太丁之子太甲任伊尹為阿衡伊尹奉嗣王祇見厥祖百官總已以聽於冢宰伊尹力牧之後居伊水故曰伊伊尹名摯陳留人

文同言三載後乞惠參身

放之桐宮曰密邇先王其訓無俾世迷王居桐宮一
年自怨自艾處仁遷義尹以冕服奉之歸亳王允德
修身諸侯咸歸縣亳今河南偃桐宮即桐鄉城今在平陽府曲沃
師縣湯所都也

伊復政將告歸敬陳一德

尹復政於王將告歸恐王德
不一任用非人作咸有一德

主善師綏先祿永底民生

尹訓王曰德無常師主善為師又
曰克綏先王之祿永底蒸民之生

傳五世有賢君中興太戊

太甲傳子沃丁沃丁傳弟太庚太庚傳子小甲小甲
傳弟雍已是時商道衰微諸侯不朝雍已傳弟太戊
凡五世太戊以伊尹子陟與臣扈為相巫咸
佐之修成湯之政商道中興巫咸夏邑人

德勝妖祥桑死帝道重興

黃河濫徙其民因循九代

毫有祥桑穀共生於朝一暮大拱王懼問陟陟曰臣聞妖不勝德於是大修先王之政早朝晏罷問疾弔喪三日而祥桑枯死三年遠方重譯而至者七十六國桑穀二木名祥妖也穀音構樹名皮可為紙王義之傳云禿千兔之翰聚無一毫之勛窮萬穀之皮斂無半分之骨若從禾為穀音谷從米為穀音叨

太戊傳子仲丁仲丁傳弟外壬外壬傳弟河亶甲河亶甲傳子祖乙祖乙傳子祖辛祖辛傳弟沃甲沃甲傳祖辛子祖丁祖丁傳沃甲子南庚南庚傳祖丁子陽甲自仲丁至陽甲凡九代因毫有河決之害仲丁遷都於囂河亶甲徙都於相祖乙徙都於耿復徙都於邢自仲丁以來諸弟子爭立惟祖乙以巫賢為相商道復興囂今開封府河陰縣相今彰德府安陽縣耿今平陽府河津縣邢今順德府邢臺縣

至盤庚還舊境改國稱殷

盤庚陽甲之弟時耿都河決王作書告諭臣民復遷於毫從湯所都改商曰殷

三甫力後三月式丁未火

子武丁以甘盤為相恭默思道居喪三年不言商道
復興自小辛至
武丁凡三朝

夢賢臣調鼎鼐作楫為霖

武丁既免喪猶弗言羣臣咸諫王夢帝賚良弼使人
以形旁求於天下說為胥靡築於傅巖惟肖命以為
相曰若作和羹爾為鹽梅又曰若濟巨川用汝作舟
楫若歲大旱用汝作霖雨

傅說

平陸人

舊講學師甘盤交修不怠

王命說曰予小子舊學於甘
盤又曰汝交修予罔予棄

敬其親豐禰廟彤日雉鳴

王祭湯廟及彤日有飛雉升鼎耳而雊祖已訓諸王
王內反諸已以思王道三祀蠻夷編髮重譯來朝者
六國彤祭之明日又祭名呂東萊曰高宗祭成湯
而有飛雉之變蓋高宗恭默思道德與天合故於祭

祀略有過厚飛雉隨而應之此雖高宗
近厚之過過於厚亦過也 彤音容

至武乙鬪天神雷霆殞命

武丁傳子祖庚祖庚傳弟祖甲祖甲傳子庚丁庚丁
傳子武乙王無道為木偶人謂之天神與之博令人
為行天神不勝乃僂辱之為革囊盛血仰而射
之命曰射天後出畋獵於河渭之間暴雷震死

兩三朝無德行國勢頽傾

武乙傳子太丁太丁
傳子帝乙商道益衰

末主紂害生靈飾非拒諫

紂帝乙子名受又名辛資辨敏捷才力過人言足飾
非智足拒諫大聚樂戲於沙邱為長夜之飲又剖孕
婦視其胎斲朝涉之脰視其髓荼毒生靈有炮烙之
法商祚至紂而終是為末主 沙邱臺在邢州平鄉
東北二十里

從帝至纣旦已刈之資至

巧以悅之使師延作朝歌北鄙之音北里之舞靡靡之樂又為酒池肉林男女裸體相逐九侯進女於王女不喜淫王殺之醢九侯鄂侯爭之並脯鄂侯後比干強諫王怒曰吾聞聖人心有七竅遂剖比干觀其心朝歌紂都今衛輝府淇縣

鉅橋粟鹿臺財適資敵國

紂造鹿臺為瓊室臺廣三里高千尺十年乃成厚賦稅以實鹿臺之財盈鉅橋之粟燎焚天下之財罷苦萬民之力後周伐紂散財發粟鉅橋倉名鹿臺臺名故址俱在淇縣

徒倒戈血漂杵衣寶焚身

周西伯伐紂紂師前徒倒戈反自攻其後血流漂杵紂走登鹿臺之上衣珠玉自焚而死

三十世六百年成湯世界

自湯至紂凡三十君共六百四十四年以湯武功成故曰成湯

二老避三仁去麥秀歌聞

初紂無道呂尚避紂東海伯夸避紂北海聞西伯善養老往歸之王庶兄微子去之諸父太師箕子佯狂為奴少師比干諫而死孔子曰殷有三仁焉後周封箕子於朝鮮箕子來朝過殷墟傷故都毀圯作麥秀之詞曰麥秀蘼蘼兮禾黍油油彼狡童兮不與我好兮殷民聞之莫不流涕微子名啓箕子名胥餘微箕采邑名呂尚姓姜號子牙其先祖封於呂尚其苗裔也伯夸姓墨名允字公信謚曰夸叔其弟也名智字公達謚曰齊蘼音尖謚法克定禍亂曰武

周武王尊太公興兵伐紂

武王名發初呂尚釣於渭水之陽文王遇之曰吾先君太公望子久矣故號曰太公望武王以尚為師謂之尚父聞紂暴虐滋甚乃徧告諸侯興兵東伐古公去豳邑於岐山之下始改國號曰周今鳳翔府西五十里是為岐周渭陽在鳳翔府寶雞縣

攷其先姓姬氏上古賢人

初堯封棄於郃賜姓姬氏為周

封后稷相唐虞教民耕種

棄封郃號曰后稷舜曰棄黎民阻飢汝后稷播時百穀按易大傳曰神農氏作斲木為耜耨木為耒以教天下則耕種之利其來久矣書曰播時百穀詩稱誕降嘉種貽我來牟則百穀之備自稷始也趙過曰后稷始畝田則畝壟之法自稷始也晉董史曰辰以成善后稷是相則農時之節自稷始也

篤公劉傳太王王季其勤

后稷三傳為公劉公劉九傳為古公亶父古公生季歷書曰太王肇基王迹王季其勤王家篤公劉周

詩篇名

文王昌姜里囚演成周易

文王名昌季歷生昌初為西伯紂以崇侯虎之讒囚文王於姜里文王曰吾惟明天人之道以順受之耳因取庖義氏八卦重為六十四卦次序演之作象辭垂世立教而筮吉凶焉前編曰太史公本紀謂西伯囚姜里益易之八卦為六十四卦其意謂伏羲止有八卦也然大傳明言八卦成列象在其中矣因而

重之爻在其中矣是庖羲已重為六十四卦矣按伏羲畫卦蓋有圖而無書有占而無文文王難姜里樂天憂世於是演而為易移先天之體為後天之用翻六十四卦變易之象而繫吉凶利否之辭其位則探河圖生成之位為後天入用之位其辭則或取之體或取之二象或取之二中或取之主爻或取之變卦或取之成卦之義丁寧告戒以前民用聖人之憂患後世於是為至姜里城故址在彰德府湯陰縣

追謚文王經
天緯地曰文

賜弓矢專征伐虞芮停爭

周臣散宜生閔天謀救文王乃求有莘氏美女及珍寶良馬因殷嬖臣費仲獻紂紂悅曰此一物足釋西伯矣乃釋之賜弓矢鉞鉞使專征伐虞芮之君爭田久而不決乃相與朝周入其境耕者讓畔行者讓路入其邑男女異路斑白不提挈入其朝士讓為大夫大夫讓為卿二國之君相謂曰我等小人不可以履君子之庭乃讓田而退虞今平陸縣芮今芮城縣俱屬平陽府

期而會者八百國皆謂紂可伐矣武王禦示天命退
守西土居二年紂惡不悛於武王十三年冬月諸侯
共推伐商武王乃大會於孟津作泰誓三篇以誓師
縣名 孟津在河南府今
武王名發

一戎衣陳牧野不用刀兵

武王陳兵牧野紂旅如林幾億萬人倒戈向後武王
兵不血刃獨夫受誅所謂一戎衣而有天下也 牧
野地名在衛
輝府城南

釋箕子封比干反商舊政

武王克商後命召公釋箕子囚命閎夭封比干墓反
商紂政由湯舊政 比干墓在衛輝府城北墓前有
碣題殷比干墓
字乃宣聖手書

式商容倖飛廉弔問窮民

商容殷賢人紂所貶退武王式其閭命畢公表之飛
廉助紂為惡驅於海隅而倖之復命南宮适散財發

粟以賑
資窮民

作旅獒卻珍奇蠻夷通道

王威德遠暢通道於九夸八蠻西旅底貢厥獒召公以非常貢物易啓玩好作書名旅獒訓王曰珍禽奇獸不育於國不寶遠物則遠人格

陳洪範訪朝鮮造請賢人

先是禹治水功成神龜負書出洛禹因別爲九疇箕子推衍增益以成篇武王訪於箕子箕子陳洪範一篇箕子不欲臣周亡於朝鮮武王遂以封之朝鮮今國名在遼東外徼

周公旦輔成王居東避位

武王崩子成王名誦年十三即位王諱閼周公名旦文王第四子以叔父負宸攝政管叔及羣弟流言曰公將不利於孺子周公遂避位居東都廣八尺畫爲斧形今之屏風其遺像也

立政

宸之狀縱
謚法安民

大雷電禾盡偃天發金勝

周公居東逾年王知罪在管蔡是年秋大熟未獲天
大雷電以風禾盡偃大木斯拔邦人大恐王與大夫
盡弁以啓金滕初武王有疾周公告於太王王季文
王請以身代納冊金滕匱中至是啓之見公請代武
王之事王執書以泣出郊迎公
天乃雨反風禾盡起歲則大熟

滅殷奄宅土中修明禮樂

初武王封紂子武庚於殷使管叔鮮蔡叔度霍叔處
監殷是爲三監至是挾武庚以叛王命周公東征殺
武庚誅鮮囚度降處爲庶人遂滅殷先是管蔡流言
奄君薄姑謂武庚曰武王既死今王尚幼周公見疑
此百世一時也請舉事於是武庚叛奄與淮夸俱叛
王滅殷後東伐淮夸遂踐奄討其君誅之徙奄新立
之君於蒲姑始武王以洛爲天下之中遷九鼎於洛
邑有宅洛之志由是成王命周公召公營之謂之東
都以朝諸侯周公作周禮自朝廷邦國至祭祀燕享
等禮無不具備朝諸侯於明堂樂名曰勺又曰武以
象伐紂之武功書曰王來紹上帝自服於土中王
氏曰洛天地之中風雨之所會陰陽之所和四方朝

聘貢賦道里適均故謂之土
中洛邑今河南府洛陽縣

召公奭相康王棠樹巡行

成王崩子康王名釗即位太保召公奭初治西方甚
得民和有司請召民公曰不勞一身而勞百姓非吾
先君文王志也乃巡行鄉邑聽斷於棠樹之下及卒
人思其政不忍伐棠樹作甘棠之詩自洛以西召
公主之今河南府陝州即周召分陝界有召伯城在
宜陽甘棠驛即巡行聽斷之所謚法溫柔好樂曰
康史略云召康公文王之
少子名醜奭或其字也

周昭王狩漢濱膠舟溺水

康王崩子昭王名瑕即位時周道漸衰王南巡狩返
濟漢濱以膠舟渡王中流船解王溺死漢水在漢
陽府城北入江謚
法儀容恭美曰昭

子穆王忘討罪八駿西巡

昭王溺死子穆王名滿即位忘討罪之師周行天下

渠六黃駒七黑驪八山子
謚法布德執義曰

命呂侯作贖刑只因財賈

王巡遊無度財匱民窮乃命呂侯作祥刑之書名曰
呂刑作為誥命頒之天下大抵增墨劓之條以盡天
下之惡而減大辟之條以逭犯死之罪既制五罰以
贖五刑之疑又制五過以寬五罰之疑刑繁而輕以
贖民罪以斂民財然哀矜惻
怛猶可想見三代忠厚遺意

征犬戎獲狼鹿荒服觀兵

王將征犬戎祭公謀父諫曰先王耀德不觀兵王不
聽征之獲四白狼四白鹿以歸自是荒服不至祭
公字謀父犬戎即昆夸也黃帝
之後今長沙武陵蠻大半是

徐偃王朝諸侯彭城走死

初徐夸率九夸伐周西至河上王畏其偏乃分東方
諸侯命徐子主之徐子得朱弓赤矢自以為天瑞僭
稱偃王陸地而朝者三十六國時王西巡聞徐子僭
號乃歸命楚伐徐徐子愛民不忍鬪乃北走彭城百

姓隨之以萬數徐子將死曰吾賴於文德而不明武備故至此徐今鳳陽府泗州

造父封祈招諫得止王心

蜚廉五世孫為造父以善御幸於穆王徐偃王作亂造父為御歸周以救亂王以趙城封造父其族由此為趙氏王欲肆意周行祭公謀父作祈招之詩以止王心曰祈招之惜惜式昭德音思我王度式如玉式如金刑民之力而無醉飽之心王聞諫改過以是獲沒於祗宮謀父周卿也食邑於祭祈司馬之官招其名也趙城縣名屬平陽府祭音蔡招音韶祗宮離宮名惜音姻

共懿孝道衰微詩人作刺

穆王崩傳子共王名繫扈共王傳子懿王名囂是時王室既衰遷都槐里詩人作詩刺之懿王崩弟孝王名辟方即位槐里故城在西安府興平縣東南即太邱城謚法既過能改曰共繫音衣扈音戶謚法溫柔賢善曰懿慈惠愛親曰孝

主馬於汧渭之間馬大蕃息乃封為附庸之君邑之
秦曰昔柏翳為舜主畜多息故有土錫姓曰嬴今其
後亦為朕息馬其使復續嬴氏祀號曰秦嬴 惡來
蜚廉子非子秦始祖秦今鞏昌府秦州隸陝
西太邱即興平縣汧渭二水名 汧音牽

天雨雹江漢冰谷徵顯著

是時天大雨雹牛馬死江漢俱凍當嬴秦始
封而災異之見若茲覆霜之象已兆於此矣

至夸王朝禮壞下見群臣

孝王崩諸侯復立懿王太子變即位是為夸王夸王
不立於父而立於諸侯之手故加禮下堂以見之觀
禮既廢王室寢衰自是永為
例矣 謚法安心好靜曰夸

厲王胡行暴虐淮夸入寇

夸王崩子厲王名胡即位王為人暴虐無道淮夸
入寇王命虢仲征之不克 謚法殺戮無辜曰厲

得衛巫能弭謗國亂逃奔

王暴虐國人謗王王怒得衛國巫人使監謗者以告則殺之國人莫敢言道路以目王喜告召公曰吾能弭謗矣召公曰是障之也塞下之口而遂上之過恐為社稷憂不聽後三年國人叛襲王出奔於彘
今平陽府霍州漢為彘縣厲王奔時築有彘城崩後有陵存焉

周召公相協和維持國政

王奔彘太子靖匿召公家國人圍之召公以其子代太子太子得脫於難召公周公以太子尚幼相與協和以同心輔政

號共和十五載斷續朝廷

王居彘十五載不敢歸周召協和以輔太子共理國事故號共和

宣王靖平淮夸勤於政事

厲王崩於彘子宣王靖即位時淮南夸叛命召虎率師討平之疆理至於南海詩人作江漢六章美之又自將以伐淮北徐夸詩人作常武六章美之周召輔

宣
開

任申伯用山甫周室中興

王任用申伯仲山甫以相輔佐早朝
晏罷以致中興諸侯於是復宗周

伐玁狁至太原不勤遠略

玁狁內侵逼近京邑王命尹吉甫北伐之逐出太原
而歸不復遠追詩人作六月六章美之太原今山
西太原府太原縣有謂太原乃關中慶陽界古之原
州今之鎮固屬平涼安定者非是 玁音顯狁音允

吉甫瀘
州人

後宮中姜王后脫珥規勤

王后姜氏賢而有德王嘗晏起后乃脫簪珥待罪於
永巷曰妾不才至使君王失禮而晏朝以見君王之
樂色而忘德也夫苟樂色必好奢好奢必窮樂窮樂
者亂之所興也原亂之興從婢子起婢子生亂當服
其辜敢請罪王曰寡人不德實自生過非
夫人之罪也遂勤於政事卒成中興之名

殺杜伯及左儒俱非其罪

朱弓矢興道左鬼報亡身

杜國之伯名恒爲周大夫宣王妾女鳩欲通之杜伯不可女鳩訴之曰恒竊與妾交王信之囚杜伯於焦其友左儒爭之王不許曰汝別君而異友也儒曰君道友逆則順君以誅友友道君逆則順友以達君王怒曰易而言則生不易而言則死儒曰士不枉義以從死不易言以求生臣能明君之過以正杜伯之無罪九諫而王不聽王使薛甫與司工錡殺杜伯左儒死之杜伯旣死即爲人見王曰恒之罪何哉召祝而以杜伯語告之祝曰始殺杜伯誰與王謀王曰司工錡也祝曰何不殺錡以謝之王乃殺錡使祝以謝杜伯司工錡爲人而至曰臣何罪之有王告皇甫曰祝也與我謀而殺人吾所殺者皆爲人而見奈何皇甫曰祝曰殺祝以兼謝焉又皆爲人而至祝亦曰我焉知奈何以爲罪而殺臣也後三年遊於圃田從人滿野口中杜伯乘白馬素衣司工錡爲左祝爲右朱衣朱冠起於道左執朱弓朱矢射王中心折脊伏於弓矢而死

周幽王寵褒如龍燎為崇

周宣王崩子幽王名宮涅即位初夏之衰也褒人之
神化為二龍而言曰余褒之二君也夏后請其燎而
藏之傳及殷周莫之發也厲王發而觀之燎流於庭
化為元龜入於王府之童妾未既齟遭之既笄而
孕當宣王時而生不夫而育懼而棄之時童謠曰
褒其服實亡周國有夫婦鬻是器者王使執之逃於
道見向所棄妖子取之亡奔於褒褒人有罪而入是
女於王以自贖王遂置之女子出褒是為褒如王嬖
愛之燎音釐龍吐沫也齟音襖毀齒也笄音稽簪
也女子十五而笄壓音掩山桑弧音胡木弓其草名
可結為服以盛矢崇音碎神禍也褒國名
今漢中褒城縣諡法動靜亂常曰幽

幸驪山舉烽火戲弄邦君

周制為烽燧寇至則舉烽火諸侯悉舉兵來援褒如
不好笑王說之萬方故不笑王語號石父曰汝有計
能令褒如笑賞爾千金石父乃進計幸驪山大舉烽
火諸侯至而無寇褒如乃大笑王為是數舉烽火其
後不信諸侯不至驪山

在西安府臨潼縣東北

三川竭岐山崩聲先裂繒

初涇渭洛三川皆震伯陽父曰周將亡矣昔伊洛竭而夏亡河竭而商亡今周德若二代之季矣其川源又塞塞必竭川竭山必崩國亡不過十年至是三川竭岐山崩褒姒好聞裂繒聲王發繒裂之以適其意至十一年幽王滅周乃東遷岐山今鳳翔府岐山縣伯陽父即李耳相傳母懷之八十一歲乃生即白首故號為老子字伯陽又曰聃為周柱下史見周衰乘青牛西出函關隱去葛稚川曰老子無世不出數易姓名出於黃帝時號廣成子周文王時號支邑先生武王時號郭叔子漢初號黃石公鬚眉皆白杖丹藜屨赤舄漢文時號河上公父音甫葛洪字稚川又名抱樸子句容人

用非才號石父結怨群臣

號石父為人佞諛好利王以為卿國人皆怨諸侯皆畔

申侯反召西夸犬戎兵動

褒姒生子伯服姒與號石父比譖廢申后及太子宜

伐王 申姜姓國今南陽府

弑幽王擄褒姒國勢分崩

時王舉烽火徵兵兵莫至犬戎遂弑王驪山下擄褒姒並殺鄭桓公友盡收寶賂而去

秦襄公鄭武公驅戎救駕

犬戎之亂秦襄公力戰却戎衛武公和晉文侯仇亦將兵救周黜伯服鄭世子掘突收父桓公散兵從諸侯迎太子於申掘突是為武公

立平王遷洛邑成許和申

平王名宜臼幽王之子鄭武公等迎立之王以豐鎬近戎乃東遷洛邑以申侯有功於已為遷畿內之民成申成許以防戎朱子曰申侯與犬戎攻宗周而弑幽王則申侯者王法不赦之賊平王不共之讐也今以立已為有德不知弑父為可怨至使復讐討罪之師反為報施酬恩之舉勞天子之民遠為諸侯戍守忘親逆理甚矣許今開封府許州謚法執事有制曰平

併西戎收餘民秦封始大

初秦襄公以兵送平王於洛王封為諸侯賜之岐以西之地曰戎無道侵奪我岐豐之地秦能攻逐即有其地與誓封爵之襄公於是始國而與東諸侯通使聘享之禮至文公十六年以兵伐戎戎敗走於是文公收周餘民以有西岐之地郿岐豐鎬盡為秦有而秦始大 豐在西安府鄠縣鎬今長安縣郿今郿州

作酈時祠上帝僭用犧牲

秦文公夢黃蛇自天下屬地其口止於酈衍問史敦曰此上帝之徵君其祀之於是作酈時用三牲郊祭白帝秦僭自此始 酈今延安府酈州時封土而祭也 酈音敷時音芷

至桓莊無威令下同列國

平王崩孫林立是為桓王鄭伯不朝王伐鄭戰於緡葛王卒大敗祝聃射王中肩劉道源曰桓王伐鄭兵敗王傷天子威令下同列國桓王崩子佗立是為莊王桓莊之時子弑父臣弑君者踵相接也而威令不行王不能問東周之衰已決於此 緡葛地名在鄭

齊桓公晉重耳五霸稱尊

齊襄公立無常公子小白奔莒及無知弑襄公齊雍廩殺無知小白乃自莒入齊是為桓公以管仲為相滅譚滅遂伐魯侵蔡伐楚盟於召陵復大會諸侯於葵邱推為盟主者三十九年晉獻公公子重耳以驪姬之譖奔蒲公伐蒲重耳奔翟及楚後秦穆公召重耳帥師納於晉而立之是為文公伐衛伐曹執曹伯敗楚執衛侯復敗秦師於殽霸諸侯主盟會者九年故稱五霸必以齊桓晉文為盛五霸齊桓晉文楚莊秦穆宋襄召陵在開封府鄆城縣東葵邱在青州府臨淄縣西蒲屬平陽府蒲州翟今延安府中部縣殽在河南府陝州

釐惠襄五十年人知管仲

莊王崩傳子釐王名胡齊釐王傳子惠王名闔惠王傳子襄王名鄭莊王時齊無知弑襄公管仲奉公子糾奔魯及齊人殺無知小白立取子糾於魯殺之以鮑叔牙之薦請仲於魯魯束縛以予齊仲至齊桓公

用以為相稱曰仲父國事皆令問仲父管仲得以盡其才後一匡九合不以兵車成霸功者仲之力也仲相於莊王丙申十二年春卒於襄王丙子七年冬共五十年釐音僖謚法有罰而還曰釐柔質慈民曰惠辟地有德曰襄管仲名夸吾字敬仲潁人

作內政寄軍令束矢鉤金

桓公問仲曰寡人欲修政以干時於天下其可乎管子曰作內政而寄軍令為高子之里為國子之里為公里三分齊國以為三軍制五家為軌軌為之長十軌為里里置有司四里為連連為之長十里為鄉鄉有良人以為軍令是故五家為軌五人為伍軌長率之十軌為里故五十人為小戎里有司率之四里為連故二百人為卒連長率之十連為鄉故二千人為旅鄉良人率之五鄉一帥故萬人為一軍五鄉之帥率之故有中軍之鼓有高子之鼓有國子之鼓春以蒐振旅秋以獮治兵是故卒伍政定於里軍旅政定於郊卒伍之人與人相保家與家相愛少相居長相遊死喪相恤居處相樂故夜戰其聲相聞晝戰其目相識歡欣足以相死以守則固以戰則勝可以橫

甲兵吾欲輕重罪而移之於甲兵重罪贖以犀甲一
戟輕罪贖以韜盾一戟小罪適以金分宥間罪索訟
者三禁而不可上下坐成以束矢美金以鑄劍戟試
諸狗馬惡金以鑄鉏耜斤櫛試諸壤土高子國子
皆齊上卿內政國政也寄託也居則爲軌出則爲伍
所爲寄軍令也重罪死刑也犀犀皮也可用爲甲戟
車戟也輕罪劓剕之屬韜盾綴革有文如韜也小罪
不入於五刑者以金贖有分兩之差今之罰金是也
書曰金作贖刑聞罪刑罰之疑者也周禮以兩造禁
民訟入束矢於朝然後聽之註以兩劑禁民獄入鉤金
三日乃致於朝然後聽之註云訟謂以財貨相告者
造至也使訟者兩至既兩至使入束矢乃治之不入
束矢則是自服不直者也必入矢者取其直也管子
書註云十二矢爲束矢周禮註謂古者一弓百矢束
矢百個也獄謂相告以罪者劑今券書也使獄者各
齎券書既兩券書使入鉤金又三日乃治之重刑也
不券書不入金則是亦自服不直者也必入金者取
其堅也三
十觔曰鉤

蛇從龍佐亡人趙衰狐偃

初晉重耳出奔嘗餒於曹介子推割股以食之及歸
賞從亡者狐偃趙衰顛頤魏犢而不及子推子推之
從者懸書宮門曰有龍矯矯頃失其所五蛇從之周
流天下龍飢乏食一蛇割股龍返於洞安其壤土四
蛇入穴皆有處所一蛇無穴號於中野公曰寡人之
過也使入求之不得隱綿山中焚其山子推死焉先
是秦穆公使公子繫弔重耳於翟曰喪不可久時不
可失舅犯曰亡人無以爲寶仁親以爲寶介子推
姓王名光臨晉人狐偃狐突之子
趙衰字子餘臨晉人魏犢號武子

狩河陽盟踐土顛倒君臣

晉文公作王宮於踐土獻楚俘於王王策命文公爲
侯伯與諸侯盟於踐土諸侯朝於王所後晉召王以
諸侯見會於河陽春秋曰以臣召君不可以訓故書
曰天王狩於河陽河陽今懷慶府孟縣踐土地名
在開封府
滎澤縣

頃匡定禮樂崩憑誰整頓

襄王崩傳子頃王名壬臣頃王傳子匡王名班匡王

頃貞心大度曰匡安民法古曰定

楚莊王與士馬問鼎欺心

楚本子爵自夸王之世已僭稱王及厲王暴虐復去王號至莊王旅始伯伐陸渾之戎觀兵周郊王使王孫滿勞之莊王問鼎之大小輕重滿曰在德不在鼎周德雖衰天命未改鼎之輕重不可問也莊王慚而退陸渾之戎即秦晉遷之伊洛者

簡王後至靈王時生孔聖

定王崩傳子簡王名夸簡王傳子靈王名泄心庚戌二十一年冬十一月夏正八月二十七日孔子生其先宋人至孔父嘉五世親盡別為公族故以孔為氏六世祖孔父嘉之子奔魯遂為魯人父叔梁紇無子求婚於顏氏顏氏以女徵在妻之禱於尼邱生孔子因名丘字仲尼魯謚尼父漢追謚宣尼父後周追封鄒國公唐追封文宣王宋加至聖文宣王元加大成至聖文宣王明嘉靖中改文宣王稱為先師易塑像為木主世封其後為衍聖公擇其後之賢者世知曲阜縣謚法平易不訾曰簡亂而不損曰靈

祖堯舜憲文武撐柱斯文

孔子序書記禮刪詩正樂晚而喜易序易象繫象說卦文言以詩書禮樂教弟子蓋三千焉身通六藝者七十二人孔子曰文王既沒文不在茲乎天之未喪斯文也匡人其如予何中庸謂仲尼祖述堯舜憲章文武

鳳兮歌喪狗譏轍環不遇

孔子之楚楚狂歌曰鳳兮鳳兮何德之衰適鄭鄭人曰東門有人其類似堯其項類臯陶其肩類子產其腰以下不及禹者三寸纍纍然若喪家之狗轍環所至幾遍天下卒偃蹇於七十二君之庭道大難容尼山終老楚狂名陸通字接輿

作春秋誅亂賊絕筆書麟

魯人西狩叔孫之車士曰子鉏商獲獸傷其左足載以歸孔子觀之曰麟也胡為乎來哉反袂拭面而涕曰吾道窮矣於是因魯史作春秋以尊天王以誅亂

四十一年四月孔子卒年七十三

景悼敬兩三朝家翻國亂

靈王傳子景王名貴景王無適子傳次子悼王名猛初景王太子聖早卒少子朝有寵景王欲立之未果王崩單子劉子立猛為王朝作亂劉子單子以王猛如皇晉人帥師納入王城猛尋卒諸大夫奉王猛同母弟丐為王是為敬王謚法由義而齊曰景善合法典曰敬

元貞定哀思考弑立紛紜

敬王傳子元王名仁元王傳子貞定王名介貞定王傳子去疾是為哀王立三月弟叔弑之而自立是為思王立五月少弟嵬殺之而自立是為考王謚法行義說民曰元清白守節曰貞紀行不爽曰定

勞攘攘數百年中原瓦裂

是和非長共短史記評論

漢武帝時太史司馬談之子遷為太史令續父談書作史記起黃帝迄漢武獲麟之歲撰十二紀以序帝

王十年表以貫歲月八書以紀政事三十世家以敘公侯七十列傳以志士庶上下三千餘歲凡百三十篇司馬遷字子長絳州龍門人

秦穆公宋襄公假行仁義

秦穆公名任好三置晉君一救荆禍迨伐姜戎益國十二開地千里遂伯西戎宋襄公名茲父始而執滕公使邾文公用鄆子於次睢之社一會而虐二君遂成霸業卒之孟之會為楚所執泓之戰楚傷其股國人咎之襄公曰君子不重傷不禽二毛古之為君也不以阻隘寡人雖亡國之餘不鼓不成列世笑以為宋襄之仁

吳夫差越勾踐改號稱尊

武王封泰伯之後於吳夏少康封子無餘於會稽以奉禹祀號曰越夫差闔閭之子偃號稱吳王勾踐允常之子偃號稱越王初闔閭伐越敗於檣李闔閭傷將指卒夫差伐越敗越於夫椒勾踐行成於吳後勾踐返國二十餘年伐吳吳兵敗夫差自殺越遂滅吳

夫林在常川無金
縣太湖濱 鵠音醉

魯曹沫七登壇收還侵地

初齊桓公伐魯魯敗莊公獻遂邑以平桓公許與魯盟將盟曹沫以匕首劫桓公於壇上曰反魯之侵地桓公許之沫去匕首北面就臣位桓公悔欲無與魯地而殺沫管仲曰棄信於諸侯不可遂還魯侵地

趙武子孤得立杵臼程嬰

晉靈公爲趙穿所弑趙盾亡不越境反不討賊太史書曰趙盾弑其君盾死子朔嗣屠岸賈始有寵於靈公至景公三年賈爲司寇乃治靈公之賊攻趙氏於下宮殺朔朔妻晉成公姊莊姬有遺腹生男賈聞索之朔客公孫杵臼謂朔友程嬰曰立孤與死孰難嬰曰死易立孤難耳杵臼曰子強爲其難者吾爲其易者乃取他兒匿山中嬰出謬曰予我千金吾告趙氏孤處賈使人隨嬰攻殺孤兒及杵臼趙氏真孤反在嬰與匿山中名曰武後景公疾卜大業之後不遂者爲祟韓厥曰大業之後在晉絕祀者其趙氏乎公問趙後厥以實告乃召趙孤兒匿之宮中諸將入問疾公因厥衆以脇諸將而見武諸將歸罪於賈且請立

趙後遂與嬰武攻賈滅之復與武田邑如故嬰曰手將下報趙宣孟與杵臼武泣嬰曰彼以我為能成事故先我死今我不報是以我事為不成遂自殺程嬰杵臼俱太原人趙盾字孟謚宣子

季札來聘上邦請觀周樂

吳子壽夢四子長諸樊次餘祭次餘昧次季札壽夢見札賢欲立之札辭乃立諸樊諸樊卒必欲致國於季札卒不受棄其室而耕乃舍之封之延陵號延陵季子使聘於魯請觀周樂魯人為奏六代之樂使工為之歌周南召南曰美哉始基之矣又為之歌衛歌王歌鄭齊豳秦魏以至歌唐歌陳札皆如其歌以美之自鄆以下無譏焉更為之歌小雅大雅以至歌頌曰至矣哉五聲和八風平節有度守有序盛德之所同也見舞象箏南籥者曰美哉猶有憾見舞大武者曰周之盛也見舞韶濩者曰聖人之弘也而猶有慚德見舞大夏者曰非禹孰能修之見舞韶箏者曰德至矣哉大矣如天之無不疇也如地之無不載也雖甚盛德其蔑以加於此矣觀止矣雖有他樂吾不敢請矣其出聘也通嗣君也遂歷聘於齊鄭衛晉六代之樂黃帝雲門堯大章舜韶禹大夏湯大濩

國僑相聽國政與濟途人

公孫僑聽鄭國之政以乘輿濟人於溱洧從政一年
輿人誦之曰取我衣冠而褚之取我田疇而伍之孰
殺子產吾其與之及三年又誦之曰我有子弟子產
誨之我有田疇子產殖之子產而死誰其嗣之及卒
孔子曰古之遺愛也子產姓公孫名僑字子產以父子國之字為氏故曰國僑褚藏也

田穰苴掌兵權立誅莊賈

齊景公時師敗於燕晉晏嬰薦司馬穰苴為將軍穰
苴曰臣素卑賤願得君之寵臣以監軍公使莊賈往
苴與賈約日中會於軍門苴先馳至軍門夕時賈始
至苴曰何後期賈曰親戚送之故留苴曰將受命之
日則忘其家臨軍約束則忘其親援抱鼓之急則忘
其身何相送乎召軍正問曰軍法後期而至云何曰
當斬賈懼使人馳報景公求救未及返而斬賈久之
公遣使持節救賈馳入軍中苴曰軍中不馳今使者
馳云何軍正曰當斬苴曰君之使不可斬乃斬其僕
車之左馱馬之左驂以徇三軍始閱士卒身自撫循
勒兵大敗晉師穰苴田完之後晏嬰薦於景公拜
為將軍燕晉聞之皆解去後齊威王用兵大倣穰苴

之法諸侯來朝王乃追論古者司馬兵法而附穰苴於其中因號曰司馬穰苴兵法

孫武子教戰陣令斬宮嬪

孫武子齊人以兵法見於吳王闔閭王曰勒兵可試以婦人乎曰可於是出宮中美女孫子分爲二隊以王之寵姬二人名爲隊長皆令持戟令之曰汝知而心與左右手背乎婦人曰知之孫子曰前則視心左視左手右視右手後則視背婦人曰諾約束既布乃設鈇鉞即三令五申而鼓之右婦人大笑孫子曰約束不明申令不熟將之罪也復三令五申而鼓之左婦人復大笑孫子曰約束已明申令已熟而不如法者吏士之罪也乃欲斬左右隊長吳王從臺上見斬愛姬趣令曰寡人非此二姬食不甘味願勿斬也孫子曰將在軍君命有所不受遂斬隊長二人以徇用其次爲隊長於是復鼓之婦人左右前後跪起皆中規矩繩墨孫子報王曰兵既整齊雖赴水火可也王遂以爲將西破強楚北威齊晉顯名諸侯

伍子胥入郢宮鞭屍報怨

楚平王使伍奢爲世子建師費無極譖之王執奢使

敗奔鄭吳師五戰及郢楚昭王奔隨吳人入郢以班
處於王宮員掘平王屍鞭之郢今安陸府一云郢
楚之舊都在荊州府城東北三里伍員字子胥監

利人

越范蠡破姑蘇棄職辭君

初越敗於吳用范蠡計行成於吳及返國蠡與勾踐
謀賂吳太宰伯嚭潛殺伍員遂伐吳吳兵敗棲於姑
蘇亦使人行成於越不許夫差自殺蠡以勾踐可與
共患難不可與同安樂乘輕舟泛五湖浮海出齊變
姓名自號鴟夷子皮父子治產數千萬齊人聞其賢
以爲相蠡曰久受尊名不祥歸相印散其財間行止
於陶又謂陶朱公姑蘇山名在蘇州府陶
今兗州府定陶縣范蠡字少伯南陽人

韓趙魏求諸侯六卿分晉

初晉有智氏韓氏魏氏趙氏范氏中行氏號爲六卿
六卿強晉侯不能制貞定王十一年智伯與韓趙魏
共滅范中行氏而分其地十六年智伯帥韓趙魏之甲
以攻趙趙襄子走晉陽三家圍而灌之襄子使張孟

談潛出見魏桓子韓康子乃陰與約決水灌智伯軍
又殺智伯而三分其地後趙襄子卒立兄伯魯之孫
浣是為獻子獻子之子籍與魏桓子之子斯韓康子
之孫虔於威烈王時俱請為諸侯王許之虔為景侯
籍為烈侯斯為文侯
晉陽今太原縣

威烈王寵反叛自壞彝倫

考王崩傳子威烈王名午二十三年初命晉大夫魏
斯趙籍韓虔為諸侯通鑑托始於此司馬公曰晉
大夫暴蔑其君剖分其地天子既不能討又寵秩之
是三晉之列於諸侯非三晉之壞禮乃天子之自壞
之也謚法強毅執正
曰威秉德尊業曰烈

安烈顯守宗祧綿綿一脈

威烈王崩傳子安王名驕安王傳子烈王名喜烈王
傳弟顯王名扁三王之時列國憑陵王室衰弱諸侯
不知有天子矣謚法好和不爭
曰安烈謚見前行中見外曰顯

真見王雍虛居奄奄衰雲

楚令尹昭子曰東周地不過百里裂其地不足肥國得其衆不足勁兵然而猶有欲攻之者見祭器在焉故也今子欲殘天下之共主居三代之傳器吾恐器南則兵至矣

收拾在赧王朝窮居僻地

慎靚王崩子延立是爲赧王自顯王二年韓趙分周地爲二以兩周公治之王寄焉而已慎靚以上皆居成周赧王微弱遷王城依西周武公謚法喪國心恤曰赧

就中間千百樣變化縱橫

二百載入春秋干戈硬併

入春秋者凡二百四十二年弑君三十六亡國五十二諸侯奔走不得保其社稷者不可勝數

九州中七暴國氣勢相吞

秦韓燕趙魏齊楚爲戰國七雄

鄒子與孟軻氏尊王賤霸

孟子名軻字子與鄒人受業孔子之孫子思魏惠王卑辭厚禮以招賢者孟子至梁言仁義王以為迂遠不能用去魏適齊見齊宣王言仁政陳王道恥道桓文之事齊以為客卿後致為臣而去

距楊墨闢邪說不合終身

時方從衡處士楊墨之言盈天下孟子乃述堯舜三王孔子之道以正人心距楊墨息邪說故所如不合及卒門人記其言為孟子七篇楊子名朱墨子名翟為宋大夫著書十五卷七十一篇以貴儉兼愛尊賢右鬼尚同為說

齊孫臏魏龐涓爭強鬪智

初孫臏與龐涓俱學兵法及涓事魏為將軍自以能不及臏乃召之至則斷其足而黥之齊使者至魏臏陰見之使者竊載以歸田忌進之威王會魏伐趙威王救趙使忌為將而臏為師居輜車中坐為計謀忌欲引兵之趙臏曰不若疾走大梁彼必釋趙自救是

趙廉頗秦白起賭勝誇能

涓歸禦齊師贖使齊軍入魏地日減竈誘涓涓果喜
曰吾故知齊軍怯入吾地三日士卒亡者過半矣乃
倍道逐之贖度其暮當至馬陵馬陵道陜而旁多阻
隘乃斫大樹白書之曰龐涓死此樹下令萬弩夾道
而伏期日暮見火舉而俱發涓果夜至見白書以火
燭之讀未畢萬弩俱發涓自刎曰遂成豎子之名
大梁今開封府馬陵道在大名府城東南 陜音狹

廉頗仕趙攻齊拔晉陽伐魏取安陽封信平君白起
仕秦攻趙取狼城攻楚拔鄢郢燒彝陵楚徙都陳封
武安君後秦使王齕攻上黨拔之上黨民走趙趙廉
頗軍長平以按據之齕因伐趙趙軍數敗頗堅壁不
出趙王怒數讓之應侯使人反間曰秦獨畏馬服君
之子括為將耳廉頗易與趙遂以趙括代頗將秦聞
括為將乃陰以武安君為上將而齕為裨將令軍士
有敢泄者斬括至擊秦武安君佯敗走括乘勝追之
造秦壁壁堅拒不得入秦奇兵絕其後趙軍食絕四
十六日括自出搏戰秦射殺之卒四十萬人皆降武
安君盡坑之 范雎封應侯趙奢封馬服君鄢今宜
城縣屬襄陽府彝陵州名屬荊州府陳州名屬開封

府上黨今山西潞安府長平今澤州高平縣馬服山名在邯鄲武安郡名今彰德府磁州應今葉縣

魯連子射聊城解紛排難

燕將攻齊聊城拔之或譖之燕孝王燕將保聊城不敢歸齊田單攻之歲餘不下魯仲連乃為書約之矢以射城中曰為公計者不歸燕則歸齊今獨守孤城齊兵日益而燕救不至將何為乎燕將見書泣三日遂自殺聊城亂單克之歸言中連於齊王欲爵之仲連逃之海上曰吾與富貴而詘於人寧貧賤而輕世肆志焉初秦攻趙曰吾攻趙旦暮且下諸侯敢救者必移兵先擊之新垣衍說趙欲共尊秦為帝以卻其兵仲連聞之見衍曰秦萬乘之國梁亦萬乘之國秦帝則將行天子之禮以號令天下變易諸侯之大臣奪其所憎而與其所愛梁王安得晏然而已乎衍再拜曰吾今乃知先生天下士也後信陵君大破秦軍趙君弟平原君勝欲封仲連不受乃以千金為壽連笑曰所貴為天下士者為人排患難解紛亂而無取也遂辭去逃於海上著有魯仲連子書十四篇聊城縣名屬東昌府鄴今河南彰德府臨漳縣

相如蜀也會重趙輕秦

王不行示趙弱也趙王乃行相如從頗送至境與王
訣曰王行不過三十日過此不還則請立太子以絕
秦望王許之及會飲酒酣秦王請趙王鼓瑟趙王鼓
之相如請秦王擊缶秦王不肯相如曰五步之內臣
請得以頸血濺大王矣左右欲刃相如相如張目叱
之左右皆靡秦王為一擊缶罷酒秦終不能有加於
趙王歸以相如為上卿 澠池今縣屬河南府缶盛
酒瓦器秦俗擊之以節樂 蘭
音吝澠音免缶音阜濺音薦

施戰策冠七雄田單樂毅

齊王伐燕醢子之殺燕王噲國人立太子平為燕昭
王日夜撫循其人悉起兵伐齊以樂毅為上將軍齊
湣王戰於濟西大敗湣王走莒樂毅入臨淄燕封毅
為昌國君乘勝長驅齊城望風而潰毅禁侵虐禮逸
民寬賦斂除暴令齊民喜悅六月之間下齊七十餘
城戰國以來能行仁義之師以伐有罪者惟毅一人
而已是時惟莒即墨二邑未下楚使淖齒救齊齒欲
與燕分齊地遂殺湣王於鼓里王孫賈攻齒殺之立
湣王子法章為齊王保莒以拒燕即墨人曰田單多
智習兵立以為將毅圍二邑三年會燕昭王薨惠王

立惠王爲太子時不快於毅單乃縱反間曰樂毅與燕新王有隙欲連兵王齊故且緩攻即墨齊人惟恐他將來即墨殘矣惠王乃使騎劫代將毅遂奔趙單知毅去乃收城中得牛千餘爲絳繒衣畫以五彩龍文東兵刃於其角灌脂束葦於其尾鑿城數十穴夜縱牛燒葦端壯士五千人隨之牛熱怒犇燕軍所觸盡死傷城中鼓譟從之燕軍大敗齊人殺騎劫七十餘城皆復乃迎襄王於莒入臨淄以單爲相封安平君莒今屬青州府昌國今曹州梁邱故城在淄川東北即墨今縣屬萊州府臨淄今縣屬青州府安平今縣屬真定府樂毅靈壽人樂羊之後奔趙封望諸君湑音敏

掉舌尖說六國張儀蘇秦

洛陽人蘇秦說秦王以兼天下之術不用乃往說燕之公曰燕之所以不被兵者以趙蔽其南也王與趙從親則燕無患矣文公從之資秦車馬以說趙肅侯曰山東之國莫強於趙然秦不敢伐趙者畏韓魏之議其後也爲大王計莫若一韓魏齊楚燕趙爲從親以擯秦秦攻一國五國各出銳師以撓秦則秦必不敢出函谷以害山東矣肅侯悅使約於諸侯秦乃說

秦恐秦伐趙而敗從約乃召儀辱之以激怒儀儀念
諸侯獨秦能苦趙遂入秦秦陰遣其舍人齎金幣資
儀儀得見秦王王悅之以爲客卿舍人辭去曰蘇君
憂秦伐趙敗從以爲非君莫能得秦柄故激怒君使
臣陰奉給君資盡蘇君之計儀曰爲吾謝蘇君蘇君
之時儀何敢言後秦去趙使燕又自燕奔齊秦爲齊
大夫所殺儀乃說魏襄王倍從約請成於秦秦相儀
儀說楚王曰夫爲從者無異於驅羣羊而攻猛虎不
格明矣今王不事秦秦劫韓驅梁而攻楚則楚危矣
大王誠聽臣請令秦楚長爲弟兄之國楚許之儀遂
說韓說齊俱從之復西說趙王曰大王率天下擯秦
秦不敢出函谷者十五年今楚與秦爲昆弟韓梁稱
藩齊獻魚鹽之地此斷趙之右肩也莫如與秦約爲
兄弟趙王許之復北說燕王王請獻常山之尾五城
秦封儀爲武信君張儀歸報未至咸陽秦君卒諸侯
復合從常山在真定府曲陽縣鬼谷姓王名詡居
清溪之鬼谷年數百歲秦儀嘗問道三年辭去鬼谷
曰二子輕松喬之永壽
貴一旦之浮榮惜哉

養劒客四豪門雞鳴犬盜

齊田文襲父嬰封於薛號孟嘗君趙惠文王弟勝封平原君楚黃歇爲春申君魏安釐王異母弟公子無忌封信陵君俱好招致諸侯游士及任俠姦人食客嘗數千人時謂四豪秦昭王聞文賢使請於齊以爲相或謂秦王曰文相秦必先齊而後秦秦其危哉秦王囚文欲殺之文使人求解於王之幸姬姬欲得其狐白裘而文先已獻於秦王矣客有善爲狗盜者盜裘以獻姬言於王而遣之王後悔使追之文至關關法雞鳴乃出客時尚早追者將至客有善爲雞鳴者野雞皆應之文乃得脫歸林奇石曰荆軻劍客之最下者也孟嘗以劍俠重齊平原以劍俠重趙春申以劍俠重楚信陵以劍俠重魏之四君者皆以劍術爲秦敵而支其國於垂涎暴虎之吻王安石曰孟嘗君特雞鳴狗盜之雄耳豈足以言得士綱目書齊號田文爲孟嘗君提要以號作封正義曰平原春申信陵並皆號也孟嘗是謚

破秦關三戰國蟻聚蜂屯

孟嘗君免相於秦歸齊而怨之與韓魏共攻秦敗秦軍兵入函谷關秦王懼使公子池割河東三城以和

侯嬴頭晉鄙椎何其猛烈

魏隱士侯嬴年七十爲夸門監者信陵君置酒大會賓客坐定信陵從車騎虛左自迎侯生侯生至引坐上座賓客皆驚及秦圍趙趙平原君夫人信陵君姊也使者冠蓋相屬於魏讓魏救不至魏使晉鄙救趙次於鄴畏秦勿戰信陵君乃屬賓客欲赴關以死於趙謀之侯嬴嬴曰吾聞晉鄙兵符在王卧内而如姬最幸力能竊之昔如姬父爲人所殺公子使客斬其讐頭如姬欲爲公子死無所辭誠一開口則得虎符奪鄙兵北救趙西却秦此五霸之功也信陵君如其言如姬果盜兵符與信陵君侯嬴曰將在外君命有所不受公子即合符而晉鄙不授公子兵而復請之危矣臣客屠者朱亥可與俱此人力士晉鄙聽大善不聽可使擊之臣宜從老不能請數公子行日以至晉鄙軍之日北鄉自剄以送公子信陵君請亥亥笑曰臣乃市井鼓刀屠者而公子親數存之今公子有急此臣効命之秋也遂與公子俱至鄴鄙合符果疑欲勿聽亥袖四十觔鐵椎椎殺鄙信陵君遂將鄙兵進破秦軍於邯鄲下初公子至鄴之日嬴果北鄉自剄

剄邯鄲縣名屬廣平府大梁城東門曰夸門

荆軻七漸離筑一樣酸辛

燕太子丹嘗質於趙與秦王善及秦王即位丹質於秦秦王不禮之丹怒亡歸欲報之聞衛人荆軻賢卑禮請見使劫秦王反諸侯侵地不可則刺殺之軻曰行而無信秦未可親時秦將軍樊于期得罪亡燕乃見于期曰秦王購將軍頭金千觔邑萬家奈何于期流涕曰計將安出軻曰願得將軍首獻秦王秦王必喜而見臣臣左手把其袖右手搥其胸則將軍之讐復而燕之愧除矣于期遂自刎乃函盛其首與燕督亢地圖并以所預求天下之利匕首遣軻入秦至咸陽見王奉圖以進圖窮而匕首見把王袖而搥之王驚起袖絕軻逐之環柱而走秦法羣臣侍殿上者不得操尺寸兵左右以手共搏之且曰王負劒王遂拔以擊軻斷其左股軻引匕首擲王不中罵曰事所以不成者欲生劫之必得約契以報太子也遂鋸殺軻初軻將適秦太子賓客皆白衣冠送之至易水上軻客高漸離擊筑軻和而歌爲變徵聲士皆垂涕歌曰風蕭蕭兮易水寒壯士一去兮不復還於是白虹貫日復爲羽聲慷慨士皆瞋目髮上衝冠軻死王盡逐丹軻之客漸離變姓名爲人傭保匿作於宋子後以

之正義曰左手堪其胸秦王曰今日之事從子計耳
之聽琴而死召姬人鼓琴琴聲曰羅穀單衣可裂而
絕八尺屏風可超而越鹿盧之劍可負而拔王於是
奮袖超屏風而走之燕今順天府督亢陂名在順
天府涿州燕之腴地也易水在保定府安州宋子縣
名今屬鉅鹿說苑曰七首尺八短劍也其頭類七故
名又禮冬官桃氏為劍注七首長二尺重二觔一兩
三分兩之一荆軻字次非淇人堪音鎮亢音剛擲
音擲筑音竹似瑟而小又似箏十二絃以竹擊之不
鼓故名曰筑矐海各反
以馬屎燻目令失明

八百年周社稷東西滅裂

周自武王至赧王共八百六十七年始都鎬為西周
繼都洛為東周後又都洛之成周為東周而以洛之
王城為
西周

至赧王獻國邑併入西秦

秦伐韓趙赧王怒與諸侯約從欲伐秦秦使將軍樛
攻西周赧王入秦頓首受罪盡獻其邑三十六口三

萬秦受其獻而歸

王於周王尋崩

細思量夏商周八十四主

能幾箇崇仁義有道仁君

開基主濟蒼生知甘識苦

守成君居富貴不會溫存

禁不止令不行諸侯放肆

恩不流政不節百姓生嗔

一朝滅一朝興魚龍變化

一邊扶一邊倒纍卵難撐

乾打鬧占排場戲棚傀儡

專頭間肖戚却火上水凌

到頭止剩中原土

禾黍離離一望平

閱盡殘篇斷簡細評千古英雄功名富貴笑談中回首
一場春夢 昨日香車寶馬今朝禾黍秋風誰強誰弱
總成空傀儡棚中搬弄 西江月

冰弦歇指談鋒鈍

明日重來細講論

廿一史彈詞註卷之二

廿一史彈詞註卷之三上

成都楊 慎用修編著

漢陽張三異禹木增定

男仲璜別麓註 孫坦麟畫臣校

第三段 說秦漢 臨江仙

滾滾長江東逝水浪花淘盡英雄是非成敗轉頭空青
山依舊在幾度夕陽紅 白髮漁樵江渚上慣看秋月
春風一壺濁酒喜相逢古今多少事都付笑談中

詩曰

成敗興亡古至今飛雲去鳥入銷沉荒郊廢塚傷心
處不待田文聽鼓琴

張三言卷二
記得東周併入秦回頭楚漢鬧乾坤時來驟雨推潢
潦勢敗狂風捲片雲富貴一場鴛枕夢是非千載馬
蹄塵殘山剩水年年在不見謀王圖霸人

剪雪裁冰詩有味降龍伏虎事曾聞夜來說到降龍
處今日還尋伏虎人伏虎降龍輸好漢談今說古看
書人休嫌短話成長話要把新文接舊文打虎金槌
休換柄斬蛟寶劍再磨新斬蛟寶劍長三尺打虎金
槌重九觔故典尋來知往事新詞說動長精神死灰
撥火重生燄枯樹開花再遇春春去春來人易老花
開花落可憐人不如忙裏偷閒好再把新詞聽一巡

作序說夏商周三代到周赧王被秦昭王逼獻國邑旋

滅東西周而周亡

秦之先原姓嬴氏周孝王時有非子者爲主馬之官孝王封爲秦伯閱二世至秦仲其國始大傳之

莊公 襄公 文公 寧公 武公 德公

宣公 成公 穆公 康公 共公 桓公

景公 哀公 惠公 悼公 厲公 躁公

懷公 靈公 簡公 獻公 孝公 凡二十四

世孝公用商鞅之術富國強兵傳之子是稱惠文王傳之武王武王因舉鼎絕臚而死其弟名稷嗣位是爲昭王乙巳年滅周又六年薨其子孝文王即位三日而死傳其子莊襄王按莊襄王名楚先前納呂不韋之妾生

子名政莊襄王在位三年而亡其子政即位冒嬴氏之
姓甲寅年為始征伐六國二十年之後滅韓又滅趙滅
魏滅楚滅燕至庚辰年滅齊天下歸一自稱始皇帝晏
駕之日趙高殺其太子扶蘇立次子胡亥為二世皇帝
三年趙高弑之立扶蘇之子名子嬰降號為二世秦王
計誅趙高四十六日沛公入關降於軹道傍而秦亡隨
為楚項籍所殺又五年楚為漢滅天下定於一矣

漢高祖姓劉名邦平秦滅楚諸侯王奉即皇帝位在位十二年
年傳之

惠帝

在位七年

呂后

前後少帝在位各四年

文帝

元年後元在位二十三年

景帝

元年中元後元在位十六年

武帝

建元太初

元光天漢

元朔太始

元鼎征和

元鼎後元

元封元平

四年

昭帝

始元在位十三年

元鳳

元平

宣帝

本始鳳

甘露

元康黃龍

神爵在位二十五年

五鳳

河平

陽朔

元帝

初元竟寧

永光

建昭

成帝

建始鴻嘉

河平永始

陽朔

延

綏和在位二十六年

哀帝

建平

在位六年

元壽

永始

元平

平帝

元始在位五年

孺子嬰

居攝在位三年

初

始

元平

元平

凡十三主共二百十一年是為西漢被外戚王莽所奪

莽毒弑平帝廢孺子嬰改國號曰新篡位十八年漢兵

起奉宗室劉元為帝名曰更始誅莽即位三年為赤眉

所奉劉盆子所滅降封淮陽王盆子兵敗降於光武

光武皇帝劉秀者南陽宗室出景帝之裔大戰昆陽誅

王莽斬王郎平赤眉等寇神武中興建武中元在傳

之明帝永平在位十八年章帝建初和在位元和平章

和帝永元元興在位十七年殤帝延平在位一年

安帝永初元初在位十九年永寧建

順帝永建陽嘉在位十九年永和漢

冲帝永嘉在位一年質帝本初在位一年

桓帝建和和平元嘉永興永壽延熹永康在位二十二年

靈帝建寧熙平元和獻帝初平興平建中平在位二十二年安在位三十一年

凡十二主共一百九十五年天下魏蜀吳三分

秦始皇至漢獻帝通共四百三十三年中間覆雨翻雲

幾場興廢談論間不能細說略將大槩品題

七戰國秦昭王英雄獨霸

秦嬴昭襄王名稷秦武王之異母弟也質於燕武王好力戲舉鼎絕脈而死無子魏冉與國人迎稷立之將白起相范雎伐楚伐趙六國質子獻城咸有帝秦之意七國註見二段七暴國下秦嬴註見二段非子封秦下

奪周朝取世界遷徙周民

昭王攻周赧王盡獻其邑周民不樂屬秦東亡於鞏秦收其寶器遷西周公於愚狐聚愚狐聚在洛陽南即古梁城

愚音憚

昭王死子孝文繼登三日

昭襄王薨子孝文王名柱即位三日而薨

奄然間無疾病做了亡人

莊襄王恰三年龍牀未煖

莊襄王名楚孝文王之子初質於趙因呂不韋之計
歸秦爲嗣即位三年薨諡法睿智克服曰莊辟地
有德曰襄

棄羣臣亡化了結果嬴秦

楚死子政嗣政實不韋之子秦嬴氏之裔絕矣胡致
堂曰孝文立三日薨莊襄立三年薨何其遽也呂不
韋能以其子爲秦王子豈不能疾去二君以其子爲秦國王哉

秦始皇呂家兒根源不正

莊襄王名異人初質於趙陽翟大賈呂不韋適邯鄲
見異人曰此奇貨可居乃說曰太子愛華陽夫人而
無子子之兄弟二十餘人子居不甚見幸不韋請
以千金西游立子爲嗣異人曰必如君策秦國與子
共之不韋乃厚貲西見夫人姊說曰夫人愛而無子
異人賢自知中子不得爲適誠以此時拔之是異人
無國而有國夫人無子而有子也夫人遂與太子約
爲嗣因請不韋傳之不韋娶邯鄲美姬與居知其有
娠與異人飲見而請之不韋佯怒既而獻之期年生
子文異人立姬爲夫人邯鄲之圍異人亡赴秦冒薨

歸更名楚楚夢政嗣位年十三
翟秦邑今開封府禹州華陽宮名

璜按史載始皇以呂易嬴蓋以期年而生子政為據
解者曰人十月生此過二月踰常期故知為不韋子
心竊疑之今讀朱青巖輯要云婦人胎氣以十月為
滿不韋進姬於異人期年生子是納後兩月受胎何
得謂知其有娠而獻之夫婦人有娠必一二月而後
知又期年生政是始皇之生不幾上同堯禹下侔漢
昭乎蓋秦以詐力併天下漢人惡其焚書坑儒因不
韋私通於太后故遂以曖昧之事互相傳述以實之
其事與晉以牛易馬皆無實據不得挾李園而
議之也此論可解期年之疑而定呂嬴之案矣

呂不韋稱仲父於國何親

呂不韋封相國為文信侯號稱仲父後不韋以罪免
相就國歲餘諸侯使者請之相望於道始皇恐其為
變賜不韋書曰君何功於秦封河南十萬戶何親
於秦號稱仲父徙處蜀飲酖死蜀今成都府

咸陽市懸千金誇張呂覽

初不韋為相國使其客集儒書著其所聞為十二紀
八覽六論訓解各十萬言備天地古今萬物之事名

為呂氏春秋暴之咸陽市門懸千金其上有能增損一字者與之時人無能增損者高誘為序以為人非不能增損蓋憚相國畏其勢耳咸陽縣名屬西安府其地在山南水北山水皆陽故名咸陽

大陰人一場亂出醜難聞

初始皇年少太后與文信侯私通王壯文信侯恐事覺乃私求大陰人嫪毐詐為宦者進之生二子封毐為長信侯政事皆決於毐後有告毐非宦者下吏治罪毐發兵為亂始皇使相國昌平君攻毐獲之滅三族遷太后於雍殺其二子雍
今鳳翔府 嫪音勞毐音藹

承累世大威風消磨六國

秦自孝公以來累世窺周國富兵強雄吞六國至始皇承六世之餘烈亡二周而吞諸侯遂成一統

繫韓王削趙壤魏楚難存

秦十七年內史勝滅韓韓王安置潁川郡十八年命王翦伐趙趙使將軍李牧禦之秦厚賂趙嬖臣郭開言牧欲反趙王使趙蔥顏聚代牧翦大破趙軍克

剪擊破之殺其將軍項燕二十四年擄楚王負芻滅
楚置楚郡潁川郡今開封
許昌楚郡今壽州 賁音奔

滅燕國俘遼東如同刈草

秦十九年擄趙王遷趙公子嘉自立為代王與燕合
兵抗秦二十年燕太子丹以荆軻劫始皇不克秦益
發兵就王剪於中山與燕代戰於易水西遂拔薊燕
王走遼東斬丹以獻秦秦復進兵攻之至二十五年
王賁滅燕擄燕王喜
還滅代擄代王嘉

入臨淄蠶王建松柏飄零

二十六年秦王賁自燕南攻齊使陳馳誘齊王約封
以五百之地賁猝入臨淄民莫敢格齊王建遂降秦
遷之共處之松柏之間飢死齊人怨建聽賓客姦人
不早與諸侯合從以亡其國歌曰松柏耶柏耶住建共
者客耶共今
衛輝府輝縣

取百越却匈奴鞭笞天下

秦二十五年王剪自楚郡定江南降百越置會稽郡
三十二年盧生入海還因奏錄圖書曰亡秦者胡也
始皇乃遣蒙恬發兵三十萬北伐匈奴收河南地為
四十四縣始皇專以刑威立國賈誼曰始皇履至尊
而制六合執敲朴以鞭笞天下
會稽郡今紹興府河南地今寧夏
罷諸侯置郡守撐達為君

丞相王綰等言燕齊荆地遠請立諸子為王以鎮之
廷尉李斯曰周封同姓甚眾攻擊如讐敵天子弗能
禁今海內一統皆為郡縣甚足易制置諸侯不便
始皇是其議分天下為三十六郡郡置守尉監

自稱為始皇帝革除謚法

始皇自以德過三皇功高五帝乃更號曰皇帝又除
謚法曰死而以行為謚是子議父臣議君也自今以
來除謚法朕為始皇帝後以數計
二世三世至於萬世傳之無窮

登泰山大封禪立石銘勲

始皇東行郡縣上鄒嶧山立石頌功德魯儒生議封
禪義各訾異始皇出需主石余車道上封山易至嶺

封泰山立石頌德從陰道下禪於梁父封禪皆秘之
世不得而記也積土為封謂負土於泰山上為壇
而祭之除地為壇祭於梁父後改壇曰禪廣長十二
丈壇高三尺階三等而樹石泰山之上高二丈一尺
廣三尺凡封禪用玉牒書藏方石有玉檢又用石檢
十枚列於石傍檢用金繩纏以五周以水銀和金為
泥封之印以受命之璽又有玉匱一長一尺三寸以
藏上帝之冊金匱二藏帝之冊泰山在濟南府泰安
州北三里即東嶽岱宗也山高四十餘里有石表東
嶽廟封神壇鄒嶧山在兗州府鄒縣東南二十五里
即嶧山也梁父泰山下小山在泰安州
東南一百一十五里漢書以此山名縣

造鐘鐻鑄金人銷除兵器

收天下兵器聚咸陽銷以為鐘鐻鑄金人十二置宮
庭中周禮梓人為筍虞樂器所縣橫曰筍植曰鐻
其聲大而宏則於鐘宜若是者以為鐘虞是故擊其
所縣而由其虞鳴始皇二十六年有大人十二見於
臨洮身長五丈足履六尺皆夷狄服始皇以為瑞乃
銷兵器鑄為金人象之各重千石坐高二丈號曰翁
仲一書云始皇使阮翁仲將兵守臨洮聲振匈奴翁
仲死遂銅鑄其形像置咸陽宮司馬門外匈奴至有

見之者猶以為生
錄與虞通音巨

坑儒生焚聖典殄滅斯文

李斯上書曰今天下已定法令出一諸生不師今而學古聞令下則各以其學議之入則心非出則巷議臣請天下有藏詩書百家語者皆詣守尉燒之偶語詩書者棄市以古非今者族所不去者醫藥卜筮種樹之書欲學法令者以吏為師制曰可會侯生盧生相與譏議因亡去始皇大怒曰諸生或為妖言以亂黔首使御史按問之諸生轉相告引乃自除犯禁者四百六十餘人皆坑之咸陽一書云秦既焚書諸儒多謗怨召諸生至者皆拜為郎凡七百人乃密令冬月種瓜於銅谷中溫處瓜有實詔下博士諸生說之人人各異乃命就眎之先為伏機諸生各相難不能決因發機填之以土焚書坑在驪山下即坑儒谷

填大海建阿房蓬萊求藥

始皇作石橋欲通海看日出處有神人驅石入海石去不速神輒鞭之流血又東巡幸遇秦橋之水率百官以下人提一石以填之俄而橋成如履平地又以

作前殿阿房東西五百步南上可坐萬人
下可建五丈旗周馳為閼道自殿下直抵南山表山
巔以為闕複道渡渭屬之咸陽隱宮徒刑者七十餘
萬人分作阿房驪山關中計宮三百關外四百餘盧
生說始皇所居宮母令人知不死之藥可得乃令咸
陽三百里內宮觀複道相連帷帳鐘鼓美人充之所
行幸有言其處者死初燕宋無忌羨門子高之徒稱
有仙道形解消化之術自齊威宣燕昭王皆信之使
人入海求蓬萊方丈瀛洲云此三神山在渤海中仙
人及不死藥在焉始皇東遊海上方士徐市等上書
請得齋戒與童男童女求之於是發童男女數千人
往舩交海中皆以風為解曰未能至望見之焉道
德經月中仙人宋無忌白擇圖云火之精曰宋無忌
蓋其人火仙也羨門古仙人名子高阿曲也殿之四
曲皆為房阿房宮名在西安府咸陽縣東二十五里
渭南上林苑中驪山臨潼縣東南二里因驪戎所居
故名山之麓
溫泉所出

築長城修五嶺苦害生民

築長城起臨洮至遼東延袤萬餘里暴師於外十餘
年畧取南越地置桂林南海象郡以謫徙民五十萬

戊五嶺 臨洮縣臨洮水故名屬隴西郡隸陝西桂林今廣西桂林府南海今廣東廣州府象郡今廉州雷州等府皆是五嶺裴潛廣州記大庾始安臨賀桂陽揭陽唐書註云大庾嶺在虔州永明嶺白芒嶺在道州臘嶺在桂州各有小異

博浪沙飛金椎副車誤中

韓人張良五世相韓韓亡良散千金之產欲為報讐始皇東遊至陽武博浪沙中良令力士操鐵椎狙擊始皇誤中副車 陽武縣名屬開封府今縣南有博浪沙亭

十日索無踪影未免擔驚

良擊始皇不中始皇驚求弗得令天下大索十日

因巡狩至沙邱鑾輿晏駕

始皇東巡少子胡亥與李斯從至平原津病篤乃令趙高為書賜太子扶蘇與喪會咸陽而葬未付使者遂崩於沙邱 平原津今德

鮑魚車同載轉廝混尸靈

始皇崩秘不發喪棺載輜涼車中會暑輜車臭乃詔從官令車載一石鮑魚以亂其臭車有牕牖閉則輜開則涼

奸臣計暗圖謀扶蘇太子

趙高謂李斯曰扶蘇即位必用蒙恬為丞相君侯終不懷通侯之印明矣胡亥慈仁篤厚可以為嗣斯然之乃相與矯詔立胡亥為太子更為書賜扶蘇數以不能立功上書怨謗而恬不矯正皆賜死

可憐哉同恬毅賜死長城

始皇尊寵蒙氏蒙恬將兵長城蒙毅常居中謀議始皇病遣毅出禱山川未反而始皇崩趙高等遂矯詔賜蒙恬與扶蘇死扶蘇泣欲自殺恬曰陛下使臣守邊公子為監此天下重任也今一使者來安知其非詐復請而死未暮也扶蘇曰父賜子死尚安復請即自殺恬不肯死繫諸陽周還報亥欲釋恬會毅禱山川還高曰先帝欲立太子久矣而毅以為不可乃繫諸代亥至咸陽發喪襲位遂殺毅恬曰吾積功信於

秦三世矣今將兵三十餘萬其勢足以畔然而守義者不敢辱先人之教以不忘先帝也乃吞藥自殺

陽周今真寧縣屬慶陽府代秦郡今山西大同府蔚縣

秦二世用趙高指鹿爲馬

秦二世皇帝名胡亥以趙高爲中丞相高欲專權恐羣臣不聽乃先設驗持鹿獻二世曰馬也二世笑曰丞相誤耶問左右或默或言鹿高陰中諸言鹿者以法後羣臣皆畏高莫敢言其過

獄李斯阿督責黃犬東門

陳勝等兵起二世數誚讓李斯居三公位如何令盜如此斯懼乃阿二世意對曰賢主能行督責以獨斷於上羣臣百姓救過不給何變之敢圖二世於是督責益嚴民益亂後趙高譖斯長男由守三川與盜通二世使人按驗斯上書言高罪又諫止阿房宮作者減四邊征戍轉運二世曰君不能禁盜又欲罷先帝所爲下吏按罪屬高治之撈掠千餘斯誣服與由反狀論腰斬咸陽市斯顧謂其中子曰吾欲與若牽黃犬俱出上蔡東門逐狡兔豈可得乎遂父子相哭而

李三族

獄音隹癡也三川秦郡名今河南府上蔡

今縣屬
汝寧府

望夸宮求王侯至於黔首

丞相命槩不許刀下亡身

趙高數言關東盜無能為及沛公攻武關二世使責
高恐懼乃與其婿咸陽令閻樂將吏卒至望夸宮殿
門殺衛令入射上幄坐帷二世召左右皆惶擾不闢
樂前數二世曰足下驕恣誅殺無道天下皆畔其自
為計二世曰吾願得一郡為王弗許願為萬戶侯又
弗許願與妻子為黔首樂曰臣受丞相命為天下誅
足下足下雖多言臣不敢報麾其兵進二世自殺
武關在西安府商州東望夸宮秦所建在西安府東
南八
十里

子嬰起誅趙高力扶宗社

趙高立二世兄子子嬰為秦王子嬰與其二子謀曰
趙高殺二世佯以義立我使我齋見廟我稱病不行
高必自來來則殺之高果自
往子嬰刺殺高夸其三族

王氣銷天命改換了乾坤

子嬰稱王
四十六日

都只為二世君窮奢極欲

二世嘗曰人生世間譬猶騁六驥過決隙吾
欲極耳目之好窮心志之樂以終吾年壽

視蒼生如草芥重法嚴刑

趙高謂二世曰陛下刻法而嚴刑則高枕肆志
寵樂矣二世乃更為法律務益深刻 更音庚

發戍卒動人心曾魚變亂

二世發閭左戍漁陽九百人屯大澤鄉楚陽城人陳
勝陽夏人吳廣皆為屯長欲謀舉事乃丹書帛曰陳
勝王置人所罾魚腹中卒買魚烹食得腹中書怪之
會天大雨道不通度已失期乃召令徒屬曰公等皆
失期當斬壯士不死則已死即舉大名耳王侯將相
寧有種乎眾皆從之遂起兵 秦時復除者居閭里
之左今力役煩在閭左者盡發之戍屯兵以守也漁
陽今順天府薊州大澤鄉在余州豐縣北陽城今宿

州陽夏今太康
縣屬開封府

假狐鳴煽惑起廣勝張陳

陳勝又令吳廣於叢祠中夜篝火作狐鳴曰大楚興
陳勝王卒皆驚恐勝乃詐稱公子扶蘇楚將項燕為
壇而盟稱大楚勝自立為將軍廣為都尉比至陳率
數萬人入據大梁張耳陳餘詣門上謁勝大喜陳中
父老請立勝為楚王勝以問耳餘對曰將軍始至陳
而王之示天下私願將軍急引兵而西遣人立六國
後為秦益敵敵多則力分與眾則兵強誅暴秦據咸
陽以令諸侯則帝業成矣勝不聽自立為王稱張楚
以廣為假王陳
州名屬開封府

趙武臣魏王咎人人舉事

陳王以陳人武臣為將軍以耳餘為左右校尉狗趙
又令魏人周市狗魏武臣行收兵得數萬人下趙三
十餘城耳餘乃說武臣自立為趙王
周市畧定魏地立魏公子咎為魏王

齊田儋燕韓廣處處分爭

田儋故齊王族也與從弟榮橫皆豪健周市狗地
狄儋殺狄令而召豪吏子弟曰諸侯皆反秦自立齊
古之建國也儋田氏當王遂自立擊市走之略定齊
地趙將韓廣畧燕燕豪傑共立以爲燕王 狄今樂
安縣屬
青州府

劉沛公項重瞳興兵輔楚

沛人劉邦字季初爲泗上亭長會陳勝兵起沛父老
殺沛令迎季立爲沛公掾主吏蕭何曹參等爲季收
沛子弟得三千人欲以應楚楚將項燕子梁嘗殺人
與兄子籍避讐吳中會稽守殷通欲應勝梁使籍斬
通舉吳中兵收下縣得精兵八千人亦欲應楚楚
莊賈弑勝降秦陳人秦嘉起兵於郟乃立景駒爲楚
王廣陵人召平爲楚狗廣陵聞陳王敗乃拜梁爲上
柱國引兵擊秦梁遂以八千人渡江而西梁曰陳王
首事戰不利未聞所在秦嘉立景駒大逆無道乃進
擊嘉駒殺之召別諸將至薛計事沛公亦往焉居鄆
人范增年七十好奇計說梁曰楚自懷王入秦不反
楚人憐之故楚南公曰楚雖三戶亡秦必楚陳勝不
立楚後而自立其勢不長今君起江東楚蠡起之將
爭付者以君世世楚將能復立楚後也梁乃求得

楚懷王孫心立為楚懷王都彭澤後梁與秦將章邯戰敗死懷王號羽為魯公章邯擊趙羽將兵救趙大破秦兵遂以羽為上將軍項籍字羽目重瞳沛今徐州沛縣秦法十里一亭亭置長主督盜賊泗水亭在沛縣東郊今淮安府海州廣陵今揚州府薛故城在滕縣居鄆今巢縣屬無為州三戶漳水津也在相州潯陽縣界盱眙縣名屬鳳陽府

子房公能赴勢復立韓成

初項梁立楚後張良因說梁曰君已立楚後而韓諸公子橫陽君成最賢可立為王益樹黨梁立成為韓王以良為司徒西畧韓地張良字子房其先韓人家禹州封留侯謚文成

六戰國惡恨恨重興舊業

先六國為秦滅至是楚始立懷王孫心為楚懷王趙王武臣為將李良所殺張耳陳餘復立趙歇為趙王魏咎為秦敗自殺楚立魏豹為魏王田儋為秦章邯所殺齊人復立田假為王儋弟榮逐假立儋子市為齊王韓廣為燕王韓成為韓王

笑談間齊響應變了民心

時郡縣苦秦法
爭殺長吏以應

劉沛公入關陝秦降軹道

楚王遣沛公伐秦沛公北擊昌邑西過高陽下陳留
南取潁川因張良畧韓地良引兵從沛公畧南陽南
陽守降遂入武關秦將距嶢關沛公大破之遂至霸
上秦子嬰素車白馬繫頸以組降軹道傍昌邑故
城在兗州府金鄉縣界高陽里名在開封府杞縣西
陳留縣名屬開封府潁川秦郡名今屬開封南陽今
南陽府嶢關今西安藍田縣霸上在
西安府城東軹道在城東一十三里

楚項羽過驪宮一火而焚

項羽既定河北率諸侯兵西入關
掘始皇塚燒秦宮室火三月不絕

殺子嬰屠咸陽水消瓦解

羽引兵西屠咸陽殺秦降王子嬰
虜寶貨婦女而東秦民大失望

老亞夫撞玉斗賭鬪鴻門

初沛公入關或說沛公遣兵守函谷無內諸侯軍沛公從之項羽至攻破之欲擊沛公時羽在鴻門沛公在霸上范增說羽急擊勿失羽季父項伯素善張良夜馳告之欲與俱去良曰有急亡去不義因固邀伯入見沛公沛公曰吾籍吏民封府庫而待將軍所以守關者備他盜耳豈敢反乎伯曰旦日不可不早來謝歸具以告羽且曰沛公不先破關中公豈敢入乎人有大功而擊之不義羽然之旦日沛公見羽鴻門羽留飲增數目羽舉所佩玉玦示之者三羽不應須臾沛公起如廁間行趨霸上留良謝羽因以白璧一雙獻羽玉斗一雙與增羽受璧增拔劍撞破玉斗曰唉豎子不足與謀奪將軍天下者必沛公也范增羽尊為亞夫函谷在河南府新安縣東鴻門地名在臨潼縣東舊有鴻門亭項伯名纏字伯陵唉音哀

樊驂乘啗屍肩沐猴奪氣

初增目羽殺沛公羽不應增乃使項莊舞劍欲擊沛公項伯亦拔劍舞以身翼蔽沛公張良出謂樊噲曰項莊舞劍意在沛公噲即帶劍擁盾直入瞋目視羽髮指眦盡張羽目之問為誰張良曰沛公驂乘樊噲也

羽曰壯士賜之斗酒一生彘肩噲立飲啗之噲曰秦有虎狼之心天下皆畔沛公先破秦入咸陽毫毛不敢近還軍霸上以待將軍勞苦功高未有封賞之爵而聽細人之說欲誅有功之人此亡秦之續耳羽無以應後韓生說羽曰關中四塞之地可都以霸羽見秦宮室皆已燒殘又思東歸曰富貴不歸故鄉如衣繡夜行耳韓生退曰人言楚久沐猴而冠果然張晏曰沐猴獼猴也雖著人衣冠心不類人索隱曰言獼猴不任久著衣冠以喻楚人性躁暴關中東有函谷關南有峽關武關西有散關北有蕭關居四關之中故名關中東有函谷浦津龍門合河等關南有南山及武關峽關西有大隴山及隴山大震烏蘭等關北有黃河南塞是謂四塞之地

樊噲封舞陽侯

護真龍四猛士疆信侯嬰

先是范增說羽曰沛公其志不小吾使人望其氣皆為龍成五采此天子氣急擊勿失至是沛公從百餘騎見羽鴻門增使項莊舞劍樊噲直入羽賜以酒有頃沛公起如廁招樊噲出置車官屬獨騎與樊噲靳疆滕公紀成步從間道走軍滕公夏侯嬰也晉灼曰紀成紀通父以戎死事故封侯張晏曰紀通紀信

子按此則紀成即紀信也
滕公封汝陰侯紀信廣安人

封漢王用賢才築壇拜將

項羽疑沛公業已講解又惡負約因立沛公為漢王
王巴蜀漢中都南鄭初淮陰人韓信仗劍從項梁梁
敗數以策干羽不用亡歸漢為連敖坐法當斬滕公
救之言於王以為治粟都尉信數與蕭何語何奇之
王至南鄭將士思歸多道亡者信以王不我用亦亡
去何聞追之人言於王曰丞相何亡居一二日何來
謂王曰若亡何也曰臣追亡者韓信王曰諸將亡者
以十數無所追信詐也何曰諸將易得耳如信國
士無雙王欲長王漢中無所事信必欲爭天下非信
無可與計事者王曰吾亦欲東耳乃召信拜為大將
何請設壇具禮諸將皆喜人人以為得大將至拜乃
信也一軍皆驚禮畢上坐王與語大喜自以為得信
晚巴今保寧府蜀今成都府南
鄭縣名屬漢中府淮陰今淮安府

蕭丞相書六律約法安民

初蕭何從沛公入關獨取秦相府律令圖書藏之及
沛公至霸上召父老謂曰父老苦秦苛法久矣諸侯

引言言卷三

韓元帥使機謀明修棧道

初張良說漢王燒絕所過棧道以示項羽無東意全
是以韓信爲元帥將兵出定關中故修棧道以示出
兵之緩路險不容行架木爲棚而渡名曰棧
道在漢中府褒城東北棧音剪又贊上聲

度陳倉逞手段席捲三秦

初項羽三分關中以秦降將章邯爲雍王司馬欣爲塞王董翳爲翟王距塞漢路謂之三秦至是信明修棧道暗度陳倉引兵從故道出襲雍雍王邯戰敗走塞王欣翟王翳皆降雍今鳳翔縣塞名桃花林在河南府靈寶縣西至潼關翟本上郡今延安府陳倉秦縣名今鳳翔府寶雞縣故道今兩當縣屬鞏昌府

擄魏豹斬陳餘生擒夏說

分是羽從魏王多爲西魏王從趙王勛爲代王立張
耳爲常山王徙齊王市爲膠東王齊將田都爲齊王
以田榮不從楚擊秦故不封榮榮聞羽徙市而立都
爲齊王大怒擊都走之擊殺市遂并王三齊羽又以
陳餘不從入關封餘三縣餘怒使人說齊王榮資餘
兵擊常山復趙王齊與共襲常山耳亡走漢餘迎代
王歇復王趙歇立餘爲代王餘留傳趙王而使成受
君夏說守代至是漢王使韓信擊魏魏王豹盛兵蒲
阪以塞臨晉信乃益爲疑兵陳船渡臨晉而伏兵從
夏陽以木罌渡軍襲虜遂定魏地信使人請兵三
萬願以北舉燕趙東擊齊南絕楚糧道西與漢王會
於滎陽漢王乃遣張耳與俱信進擊代兵破之擒代
相夏說引兵擊趙趙王歇與成安君陳餘聚兵井陘
口廣武君李左車曰井陘之道車不得方軌騎不得
成列願假臣兵從間道絕其輜重足下高壘勿戰不
十日而兩將之頭可致麾下不聽信乃引兵下未至
井陘口三十里止舍夜選輕騎二千人人持一赤幟
從間道望趙軍誠曰趙見我走必空壁逐我若疾入
趙壁拔趙幟立漢赤幟乃出背水陣趙軍望見大笑
信鼓兵出井陘口趙開壁擊之信佯走水上軍趙果
空壁逐之水上軍皆死戰不可敗信所出奇兵馳入
趙壁皆拔趙幟立漢赤幟趙軍歸見幟大驚遂亂遁

走漢兵夾擊斬代王陳餘擒趙王歇
屬平陽府臨晉縣名屬蒲州夏陽今韓城縣屬西安
府滎陽縣名屬鄭州并陘縣名屬真定府所背之水
泚水也在真定府臨城縣西北二十五里
左車行
唐人

嚇燕書囊沙計四海馳名

信既破趙以千金募生得李左車解其縛師事之問
曰僕欲北攻燕東伐齊若何左車曰將軍擄魏王豹
誅成安君威震天下然欲舉倦敝之兵頓之燕堅城
之下曠日持久糧食單竭燕既不服齊必自強為將
軍計莫若按甲休兵遣辨士奉書於燕燕必不敢不
從燕從而東臨齊雖有智者亦不能為齊計矣信從
其策燕從風而靡信遂東擊齊楚使龍且救之且與
信夾維水而陣信夜令人囊沙壅水上流旦引兵半
渡擊且佯敗走還且喜曰吾固知信怯也遂追之信
使人決壅囊水大至且軍大半不得渡急擊殺且據
齊王廣
州府莒州
且音沮
維水源出青

追霸王至烏江奇謀妙算

初項羽自立為西楚霸王至是楚與漢約中分天下
羽解而東歸漢王追羽至固陵韓信彭越皆引兵來
羽至垓下兵少食盡信等以軍乘之圍羽數重羽夜
乘駿馬從八百餘騎潰圍南出馳至陰陵迷失道田
父給曰左乃陷大澤中漢追及之至東城止有二十
八騎羽謂其騎曰吾起兵八歲身七十餘戰未嘗敗
北今卒困於此此天亡我非戰之罪也於是欲東渡
烏江亭長艤船待曰江東雖小亦足王也羽曰天之
亡我我何渡為且籍與江東子弟八千人渡江而西
今無一人還縱江東父兄憐而王我我何面目見之
乃自刎而死楚地遂定固陵今光州固始縣垓堤
名在鳳陽府虹縣西陰陵今無為州東城在濠州烏
江浦名在和州東四里西楚孟康曰舊名江
陵為南楚吳為東楚彭城為西楚垓音該

趕田橫歸海島許大功勲

初信破齊擄齊王廣田橫後自立為齊王聞項羽已
滅橫懼誅與其徒五百餘人入居海島中後漢召橫
橫與二客乘傳降漢未至三十里自刎橫既葬二客
亦自刎島中五百餘人亦自殺海島在萊州府即墨
縣西北

扶助起漢高皇獨稱赤帝

天下既定漢王始即帝位是為太祖高皇帝初帝嘗被酒夜經澤中有大蛇當徑帝拔劒斬蛇有老嫗夜哭曰吾子白帝子也化為蛇當道今赤帝子斬之秦居西屬金金色白故曰白帝子劉堯後堯火德故稱赤帝子澤中在徐州豐縣西今名斬蛇溝

璜按升菴稱韓元帥使機謀逞手段席捲生擒四海馳名奇謀妙算許大功勲等語皆盛贊韓信之功之大也又云扶助漢高獨稱赤帝蓋因項羽曾使武涉說信欲與連和三分天下信謝之曰漢王授我上將軍印言聽計用夫人親信我我倍之不祥雖死不易武涉去蒯徹知天下權在信乃說之曰今兩主之命懸於足下莫若兩利而俱存之三分天下信曰漢王遇我厚吾豈可以鄉利而倍義乎徹曰足下必漢王之不危已亦誤矣野獸盡而獵狗烹願足下深慮之信不忍倍漢又自以功多漢終不奪我信遂謝徹此升菴扶助獨稱四字不特贊信功且原信心而深有憾於三族之夸也蒯徹字通涿郡人

仗三傑鋤暴楚嫚語分羹

帝西都洛陽置酒南宮問諸將曰吾所以有天下項
氏所以失天下者何王陵等對曰陛下使人攻城畧
地因以與之項羽有功者害之賢者疑之此所以失
天下也帝曰公知其一未知其二夫運籌帷幄之中
決勝千里之外吾不如子房鎮國家撫百姓給餽餉
不絕糧道吾不如蕭何連百萬之衆戰必勝攻必取
吾不如韓信三者皆人傑吾能用之此所以取天下
也項羽有一范增而不能用所以爲我擒也初帝爲
漢王將兵伐楚入彭城爲羽所破與數十騎遁去太
公呂后爲楚軍所獲羽置軍中爲質後楚漢俱軍廣
武羽爲高祖置太公其上曰今不急下吾烹太公王
曰吾與若俱受命懷王約爲兄弟吾翁即若翁必欲
烹而翁幸分我一杯羹羽怒欲殺之項伯曰爲天下
者不顧家殺之何益祇益禍耳得免彭城今徐州
廣武城名在開封府河陰縣北史載高祖父曰太
公母曰媼皇甫謐曰太公名執嘉又名端媼姓王索
隱曰母溫氏打得班固
泗上亭長古石碑可據

印銷鑄霎時間轉環借箸

初楚數敗漢漢王與酈食其謀撓楚權食其曰秦伐
諸侯滅其社稷大王誠能立六國後其君臣百姓必

皆戴德慕義楚必斂衽而朝王曰善趣刻印欲行張
良來謁王方食具以告良良曰臣請借前箸為大王
籌之天下遊士離親戚棄墳墓從大王遊者徒欲望
咫尺之地今復立六國後遊士各歸事其主大王誰
與取天下乎王輟食吐哺罵曰豎儒幾敗乃
公事令趣銷印酈音歷食音異其音基

斬丁公赦季布賞罰分明

初楚人季布為項羽將數窘辱帝帝以千金購布匿
者罪三族布乃髡鉗為奴自鬻於魯朱家朱家心知
其季布也買置田舍身之洛陽見滕公曰季布何罪
臣各為其主且今上始得天下而以私怨求一人何
示不廣也滕公言於帝乃赦布召拜郎中朱家遂不
復見之布母弟丁公亦為羽將逐窘帝於彭城西短
兵相接帝急顧曰兩賢豈相厄哉丁公乃還至是來
謁帝以徇軍中曰丁公為臣不忠使項氏失天下遂
斬之曰使後世為人臣無效丁
公也 丁公名固薛人厄音阨

太疑心老相國自汚田宅

陳豨初反帝往擊之呂后與蕭何以計誅韓信上聞
史吏罕可為相國益封五千戶人皆賀召平獨弔曰

上暴露於外而君守於內非被石矢之難而益封君
置衛非以寵君也以今者淮陰新反有疑君心願君
讓封勿受悉以家財佐軍何從之上說其秋黔布反
帝自將擊之數使使問相國何為客又說何曰君滅
族不久矣君入關中得民心十餘年上所為數問君
畏君傾動關中今君胡不多買田地賤賞貨以自污
上心必安何從之帝還百姓遮
道訴相國帝大悅 稀音僖

因乘勝擊冒頓幾困平城

帝封韓王孫信為韓王都馬邑匈奴寇邊信以馬邑
降帝自將擊信破其軍信亡走匈奴帝聞冒頓居代
谷使人覘之冒頓匿其壯士肥馬使者皆言可擊復
使劉敬往敬還報曰兩國相擊此宜矜夸今臣徒見
羸瘠老弱此必欲見短伏奇兵以爭利愚以為不可
擊帝怒以敬妄言沮軍械繫敬廣武帝先至平城兵
未盡到冒頓縱精兵四十萬騎圍帝於白登十日帝
用陳平計使畫工圖美女間遣人說單于妻閼氏云
漢有美女欲獻之閼氏畏奪已寵謂單于曰漢天子
亦有神靈得其土地非能有于是單于開其一角得
突出帝至廣武赦敬封為建信侯一書云漢高祖平
城之圍其城一面即冒頓妻閼氏兵強於三面陳平

訪知闕氏妬忌造木偶人運機關舞埤間闕氏望見
謂是生人慮下城冒頓必納之遂退兵乃得出此傀
儡之始也匈奴單于頭曼有太子曰冒頓自立為
單于馬邑縣名屬大同府代谷今大同府蔚州廣武
故城在太原府代州平城在大同府東白登山名上
有臺在大同府城東闕氏音烟支匈奴皇后號按
韓王名信都今史止云封信為韓王而遺去都字使
其名姓全同淮陰前輩謂史公疎漏此也冒頓音默
特

用陳平出奇計偽遊雲夢

初帝破楚更立齊王韓信為楚王人有告信反者帝
問陳平平曰古者天子巡狩會諸侯陛下第出偽遊
雲夢會諸侯於陳陳楚之西界信必迎謁謁而擒之
特一力士事耳帝乃告諸侯會陳南遊雲夢帝及至
陳信謁帝帝令武士縛信信曰果若人言狡兔死走
狗烹高鳥盡良弓藏敵國破謀臣亡天下已定我固
當烹帝曰人告公反遂械繫信以歸至洛陽赦信封
淮陰侯平佐帝凡六出奇計請捐金行反間一也以
惡草具進楚使二也夜出女子二千人解滎陽圍三
也躡足請封齊王信四也請偽遊雲夢五也解白登

之圍六也雲夢澤名在湖廣安陸府南陳平字孺子封曲逆侯謚曰獻陽武戶牖鄉人曲逆今保定府完縣

信呂后誅大將蒯醢功臣

帝以陽夏侯陳豨為代相國監趙代邊兵豨遂反帝自擊之韓信稱病不從擊豨其舍人得罪於信信欲殺之其弟上變告信陰與豨通謀呂后與蕭何謀詐言豨已敗死給信入賀信入后使武士縛信斬之遂滅三族帝初擊豨徵兵於梁梁王彭越稱病帝怒讓之其將扈輒勸王反王不聽梁太僕得罪走漢告越輒謀反帝使使掩王囚之洛陽有司治反形已具赦為庶人傳處蜀至鄭呂后從長安來王涕泣自言無罪后與俱至洛陽白帝曰彭王壯士今徙之蜀此自遺患不如誅之遂滅三族梟越首洛陽醢其肉以賜諸侯淮南王英布聞信越被誅大懼亦反帝自將擊敗之布走江南長沙王臣使人誘與走越殺之淮南故城在廬州府舒城縣東南

璜按直帝追羽至固陵與信越期會擊羽信越不至帝大敗退守張良說帝捐關以東弃之二人信越始

引兵來是時帝猜忌之心已生矣觀其項羽方擒即馳入信壁奪其軍帝之急於制信可知呂后私審食其帝知之而不能制后亟欲竊柄惟信越是憚故乘猜忌之素心肆蒞醢之慘毒而帝直信之而不以為非使信越與布三人而在后其敢王諸呂乎逮帝自將擊布致中流矢遂以病亡后與食其謀盡族諸將故不發喪使非酈商連兵還鄉之言則劉王呂不待七年垂拱後矣然則后之醢信越由於帝之忌功臣也忌功臣所以信呂后也信呂后適以滅劉宗也然韓信雖云族滅考外史當信誅時有客匿其三歲兒知蕭何與信善謀於何作書與南粵趙佗佗養為子封之海濱姓韋韓之半也今其族有鄼侯所遺書受封所賜詔勒之鼎器呂后名雉字娥姁淮陰舍人名樂說告信欲詐赦諸官徒襲呂后太子信誅樂說封侯英布臣名賁赫告布亦封侯

未央宮萬歲呼賈陳新語

未央宮帝命蕭何所治帝見其壯麗怒曰天下匈匈數歲成敗未可知何治宮室過度也何曰天子以四海為家非壯麗無以重威且無令後世有以加也上悅陸賈時為帝稱說詩書帝罵曰乃公居馬上得之

安事詩書賈曰馬上得之寧可馬上治之乎帝曰試
爲我著秦所以失天下吾所以得之者及古成敗之
國陸生乃祖述存亡之徵凡著十二篇每奏一篇帝
未嘗不稱善左右呼萬歲號其書曰新語 未央宮
在西安府西北一十四里內有
東闕北闕前殿武庫遺址尚存

商雒間四老出黃綺功成

呂后生太子盈戚姬有寵生趙王如意帝以太子仁
弱如意類已欲廢太子而立如意呂后使呂澤劫張
良畫計良曰此難以口舌爭也顧土所不能致者四
人曰東園公綺里季夏黃公角里先生宜請來令上
見之固一助也呂后使太子爲書卑辭安車迎此四
人四人至會宴置酒太子侍四老從年皆八十餘鬚
眉皓白衣冠甚偉帝怪問之四人各言姓名帝驚曰
吾求公數歲公逃避我今何自從吾兒遊乎四老曰
陛下輕士善罵臣等義不辱令聞太子仁孝恭敬天
下莫不延頸故臣等來帝曰煩公幸卒調護太子太
子竟不易皆留侯招此四人之力也四皓隱於商洛
山中故謂之商山四皓 東園公姓袁名秉又一書
云姓唐名宣明綺里季姓朱名暉字文季夏黃公姓
翟名廓又一書云姓翟名廣字少通角里先生姓周

名術字元道綱目以綺里季夏一人黃公一人蓋杜
甫詩有黃綺終辭漢之句以黃為氏也 角音六

大風歌思故鄉欵欵悲慨

帝擊誅英布還過沛置酒沛宮悉召故人父老諸母
子弟佐酒道舊故為笑樂酒酣帝擊筑歌曰大風起
兮雲飛揚威加海內兮思故鄉安得猛士兮守四方
於是起舞慷慨傷懷泣下數行謂沛父兄曰吾雖都
關中千秋萬歲後吾魂魄猶思沛其以
沛為湯沐邑復其民世世無有所與

鴻鵠飛羽翼成愛子傷心

四皓侍太子宴出帝召戚夫人指視之曰我欲易之
彼四人者輔之羽翼已成難動搖矣戚夫人泣上曰
為我楚舞吾為若楚歌歌曰鴻鵠高飛一舉千里羽
翼已就橫絕四海橫絕四海當可奈何雖有矰繳尚
安所施歌數闋戚夫人
噓唏流涕上起去罷酒

皇帝貴都長安叔孫婁敬

叔孫通說帝起朝儀采古禮與秦儀襍就之帝從之
通遂徵魯諸生及帝左右與其弟子百餘人為綿蕞

野外習之月餘帝觀之曰吾能為此令羣臣肄習
樂宮成諸侯羣臣皆朝賀莫不振恐肅敬禮畢置法
酒諸侍坐者無敢喧嘩失禮帝曰吾乃今日知為皇
帝之貴也拜通為太常齊人婁敬成隴西過洛陽求
見上曰洛邑天下之中有德易以王無德易以亡秦
地披山帶河四塞以為固卒然有急百萬之眾可具
此扼天下之吭而拊其背也帝即日車駕西都長安
拜敬郎中賜姓劉氏綿蕞置設綿索為習肄處蕞
謂以茅剪樹地為蕞位尊卑
之次蕞乃蕞之俗寫音最

去賓天付社稷平勃王陵

上擊布時為流矢所中歸疾甚呂后問曰陛下百歲
後蕭相國死誰令代之曰曹參問其次曰王陵可然
少戇陳平可以助之平智有餘然難獨任周勃厚重
少文然安劉氏者必勃也呂后復問其次曰此後亦
非乃所知也遂崩在王位四年即帝位八年壽
五十三葬長陵周勃封絳侯王陵安國侯

廿一史彈詞註卷之三上

